

JNIÑU QUIJI JEE NI JITO NDIJIN SAN JUAN

Jeē ni stéén Jesucristo tācá jniñu quiji

¹ Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyuu cá candíje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni steén ndijin yā jniñu un núū ruhū Juan jeē cúu ri mozo yā. ² Te máá rí cástūhun ndāā rī siquī tāca jéē ní jito ri ún, te nácani ndāā rī jnūhun Yaā Dios jín jnúhun jeē ní cahān ndāā Jesucristo.

³ Yōhoyo ndetū ñayuu cahu tutu yáha, te suni yōhoyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quivī coo tācá jniñu yósó núū tútu yáha.

Jeē téé Juan carta nuū ndihúxá grupo ñayuu cá candíje

⁴ Máá rí cúu Juan, te téé ri jnūhun yáha cuájeē nuū rohó, ndihúxá grupo ñayuu cá candíje jeē cáyūcu Asia. Te ñúhun ni rī jeē maá Yaā Dios na sáha ga yā jeē váha róhó jíjnáhan ró, te sáha ya jeē coo ndeyí coo sī ni rō. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñúhun ni rī jeē suni súcuan sáha ndihúxá Espíritu jeē cáhīn ya yuhu mesa nuū ndácu Yaā Dios jniñu. ⁵ Te ñúhun ni rī jeē suni súcuan sáha Jesucristo, Yaā cahān ndāā tāca jnúhun. Te xīhna gā maá yá ni natecu mēhñu

ndíyi. Te cújéhnū ya nuū tāca rey jeē iyó ñayīví. Te máá yá cúndáhú ni yā yohó, te ni nacate ya yohó núū cuéchi yó jíin níñi yā. ⁶ Te ni sáha ya jeē ní nduu yó rey jíin sūtū cájejniñu nuū Tatá yā Yaā Dios. Te na cáhán yō jeē yóhyo luu cújéhnū ya te jñí ya poder ní cáni. Amén.

⁷ Cuni sōho jíjnáhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñayuu jeē ní castújí i ya. Te tāca raza ñayuu ní cáhnu ñayīví ndahyū i jeē tu ní cá candíje i ya. Súcuā nahín coo.

⁸ Suhva cáhán maá Jítoho yō, Yaā jñí ndihí poder: Máá rí cúu nájnūhun letra A xīhna ñúhún jíin letra Z jeē sándihí na, chi máá rí ni squejéé ndihí te máá rí sínu, áchí máá Yaā iyó vijna, te ni īyo ya ní cáni, te coo ya ní cáni.

Jeē ní jito Juan jeē cújéhnū luu Cristo

⁹ Máá rí cúu hermano rō Juan jíjnáhan ró. Te inuú-ni ndóho ri jñúndóho jíin ró siquī jeē cá candíje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jñūhun Yaā Dios jíin jéé ní cachi ndaā rī jñūhun Jesucristo, jeē yúcuā ní cajñí i ruhū cuenta preso, te ni cachune i ruhū isla jeē naní Patmos. ¹⁰ Te ñn domingo ni jito ndijin rī jeē ni stéén maá Espíritu Santo nuū rī. Te ni jini sōho ri ñn jeē cána jee ñihin ichi yátá rī nájnūhun jeē tíví trompeta. ¹¹ Te ni cahán jíin rí:

Máá rí cúu nájnūhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ní cáni. Te na téé ró núū ñn tutu tāca jéé cóto ró, te tají ró quihīn nuū ndihúxá grupo ñayuu cá candíje jeē cáyūcú i ní cáhnu Asia, suu

ini ñuu Efeso, jiín ñuu Esmirna, Pérgamo, Tiatira, Sardis, Filadelfia, jiín Laodicea. Achí.

¹² Yūcuán na te ni ndicó cóto ri jeē cóto ri ndé ñn cúu jeē cahán jiín rí. Te ná ni ndicó cóto ri te ni jito ri uxā candelero oro. ¹³ Te mēhñú ndihúxá candelero un índichi maá Yaā ní nduu tēe. Te ñúhun ya ñn sahma cáni jeē jinú nde nuū jehé yā. Te núhñi ñn cinturón oro jicā yā. ¹⁴ Te ixi xíní yā chi yaa nájnūhun ixi lánchi, nájnūhun yuhvā volcán. Te tinūu ya ndíndēe nájnūhun yáñuhūn. ¹⁵ Te jehé yā xíñú jito nájnūhun cāa cuaán jéē ni ndúhvā nuū horno. Te ññin ndasí cáhán yā, nájnūhun ññin cuehē yūte náhnu. ¹⁶ Te ndaváha ya jññi ya uxā quimi. Te yuhu ya quenda jeē cāa nájnūhun espada jeē xeén ndíndúú lado, te suu cúu jnūhun ya jeē niní sándaā yā siquī cuéchi. Te nuū yā cāa nájnūhun niāndii jeē nándii ndaxín.

¹⁷ Te ná ni jito ri yā te ni cotúú rí nuū jéhé yā nájnūhun jeē ni jíhī rī. Te ni soó yā ndaváha ya siquī rī, te ni cahán yā:

Ma yūhu ró. Máá rí cúu Yaā iyó ndé xīhna ñúhún te coo ri ní cáni. ¹⁸ Te Yaā técu cúu ri. Chi ni jíhī rī te ni natecu rī, te vijna chi técu rī ní cáni. Te máá rí jññi poder siquī cuéhyi jéhni ñayuu jiín siquī lugar nuū cáyūcu ánuá ndīyi. ¹⁹ Núu súcuan te tee ró núu tútu tāca jéē ní jito ró, jeē cúu vijna jíín jéē cóo ichi núú. ²⁰ Te yāha cúu jnūhun sāhi siquī ndihúxá quimi ni jito ró jññi ndaváha ri, jiín siquī ndihúxá candelero oro. Ndhúxá quimi ún cúu nájnūhun ndihúxá jeē cácujuhnu nuū ndihúxá grupo ñayuu cácandíje. Te ndihúxá candelero cúu nájnūhun ndihúxá grupo ñayuu cácandíje.

Jnūhun cuahān nuū ndihúxá grupo ñayuu cācandíje:

Jnūhun cuahān ñuu Efeso

2

¹ Tee ró jnúhun yáha na quíhín nuū jeē cujéhnu nuū ñáyuu cācandíje ñuu Efeso: Súcuan cáhán ruhū, Yaā jeē jñí ndihúxá quími jíin ndaváha ri, te jíca cuu ri mēhñú ndihúxá candelero oro. ² Je jíni rī tācá jniñu váha cásáha ró, jeē cándihvī ni rō síquī jnúhun ri, jíin jēē cājendeyí ni rō. Te jíni rī jeē tu cājēhe ró jnúhun quívicoo ñayuu casáha néé méhñu ró. Te jíni rī jeē ní cajito ndee rō tēe cástáhú jeē cācāhān de jeē cúu de apóstol, te ni cajini rō jeē tēe stáhú cácuu de. ³ Te ni cajendeyí ni rō ni candoho ró jnúndóho, te tu ní ndínuu ni rō jeē cácuu ndasí ró jíin jniñu ri. ⁴ Te vēsú súcuan te íyó jecu jeē cahán rī nuū rō, chí tuá cáhīyo manī vāha ró jíin rí nájñūhun ni íyo manī rō jíin rí quíivī jehé. ⁵ Núu súcuan te nucūhun ni rō ndese ni castóo ró jnúhun jeē ni íyo manī rō jíin rí, te nacani ni rō, te na sáha ró nájñūhun ni casáha ró ndé quíivī ún. Te núu ma nácani ni rō, te yachī jeē rī te stāa ri candelero rō nuū ín, cúu jeē ma cuíñi ga rō jíin ñáyuu cācandíje. ⁶ Te vēsú súcuan te íyó ñn jeē váha cásáha ró, chí tu cánujnahan cuítī ni rō cājito ró jniñu néé cásáha ñayuu cāndiquīn jnūhun jeē steén Nicolás. Te suni máá rí tu nújnahan cuítī ni rī jíto ri. ⁷ Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cācandíje. Tāca ñáyuu jeē cūndeyí síquī jeneé, cuāha ri jnūhun caji i ndehē jeē cúun

xinī yújnu jeē sāha jeē cótecu i nīí cáni. Te yujnu un íin nuū jardín Yaā Dios nde andiví, áchí yá.

Jnūhun cuahān ñuu Esmirna

⁸Te tee ró jnúhun yáha na quíhín nuū jeē kujéhnu nuū ñáyuu cá candíje ñuu Esmirna: Súcuan cáhán ruhū, Yaā jeē iyó ndé xihna ñúhún te coo ri nīí cáni, te ni jihī rī te ni natecu rī. ⁹Je jíni rī tācá jniñu váha cásáha ró, jíin jnúndóho cándoho ró, jíin jéē cándoho ndáhú ró. Te vésú súcuan te cúcá ró ndihí jeē ndíso jnūhun ri. Te jíni rī jeē cácahān neé ñayuu siquī rō jijnáhan ró. Ñayuu un cácahān i jeē ñáyuu hebreo, ñayuu maá Yaā Dios cácuu i, te tuú chí cástáhú-ni i, chí sa ñayuu yíhi ndaha Satanás cácuu i. ¹⁰Te ma yūhú cuíti rō tāca jéē ndoho ró. Chí jexeén je yajni sāha jeē quívicoo sava ró vecāa jeē cóto ndee rohó jijnáhan ró, te ndoho ró jnúndóho uxī quiví. Te na cuíni nihin ró ndé cuu rō, te cuāha ri premio jeē cótecu rō nīí cáni. ¹¹Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cá candíje. Tāca ñáyuu jeē cúndeyí síquī jéneé, ma nihín i jnúndóho jeē jnahnú ndetū i cuu i vuelta uū, achí yá.

Jnūhun cuahān ñuu Pérgamo

¹²Te tee ró jnúhun yáha na quíhín nuū jeē kujéhnu nuū ñáyuu cá candíje ñuu Pérgamo: Súcuan cáhán ruhū, Yaā jeē névāha espada jeē xeén ndíndúú lado, te suu cúu jnūhun ri jeē sándaā rī siquī cuéchi. ¹³Je jíni rī tācá jniñu váha cásáha ró, te jíni rī jeē cáyūcu ró mēhñu ñáyuu jeē ndácu Satanás jniñu nuū. Te vésú súcuan te cáhīin nihin ró jíin jnúhun ri, te tu ní cánayūhu ró jeē cá candíje

ró rúhū, ni quivī ni jhī Antipas, tē ni squícu vāha ni nacani ndaā jnūhun ri. Chi ñuu rō cáyūcu ñáyuu cájejniñu nuū Satanás, te ni cajehni i Antipas. ¹⁴ Te vēsú súcuan te íyó jecu jeē cahán rī nuū rō jijnáhan ró. Chi mēhñu róhó ñáyuu ñuu Pérgamo iyó sava ñayuu cándiquīn jnūhun ni steén Balaam. Chi tē un ní steén de nuū Balac ndese squívī de ñayuu Israel cuēchi jeē cáji i jeē ni sócō nuū ídolo jíin jēē cosíquí ndēē jnáhan i. ¹⁵ Te suni íyó sava ñayuu mēhñu ró jeē cácandíje ga i jnūhun ni steén Nicolás, te jnūhun ún chi tu nújnahan cuiti ni rī. ¹⁶ Núu súcuan te nacani ni rō síquī cuéchi ró. Chi núu tuú te yachī jeē rī jíin espada jeē quénda yuhu ri, te suu cúu jnūhun ri jeē sándaā rī síquī cuéchi. Te jíin yúcuan te stóho ri ñayuu jeē candíje ga jnūhun néé un. ¹⁷ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácandíje. Táca ñáyuu jeē cúndeyí síquī jeneé, scáji rī i maná jeē yísahí ichi ándiví. Te suni cuāha ri ñn yuū cuijín núu i, te nuū ún condee ñn síhví jéé, te ni ñn ñayuu ma cúni síhví un, chi máá-ni i jeē nihín. Achí yá.

Jnūhun cuahān ñuu Tiatira

¹⁸ 'Te tee ró jnūhun yáha na quíhín nuū jeē cujéhnu nuū ñáyuu cácandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájnūhun yáñuhūn. Te jehē rī xíñú jito nájnūhun cāa cuaán jēē ni ndúhvā. ¹⁹ Je jíin rī tēcá jniñu váha cásáha ró, chi cákundáhú ni rō jnáhan ró, te cácandíje nīhin ró rúhū, te cájejniñu ró núu rī, te cájendeyí ni rō. Te jíin rī jeē vihyá gā cásáha ró vijna vēsú nde quivī jehé. ²⁰ Te vēsú súcuan te íyó jecu jeē cahán rī nuū rō. Chi íyó ñn ñahan mēhñu ró jēē

naní Jezabel, te cájēhe ró jnúhun stéén ña nuū rō. Te áchí ña jeē nácani ña jnúhun Yaā Dios. Te tuú chi jíin jnúhun stéén ña te stáhú ña ñayuu cá candíje jeē cácuu i mozo rī. Te sáha ña jeē casíquí ndéē jnáhan i, jíin jéē cáyeji i jeē ni sócō nuū ídolo. ²¹ Te ni jēhe ri tiempo jeē na nácani ni ña, te tu cúní ña nacani ni ña stóo ña jeē casíquí ndéē ña. ²² Núu súcuan te na sáha ri jeē jécāva ña jíin cuéhyī. Te tāca ñáyuu casíquí ndéē jíin ña, suni cuāha ri jnúndóho xeēn nuū i, te núu ma nácani ni i stóo i jniñu néé nájnūhun sáha ña. ²³ Te sáha ri jeē cúu ñayuu jeē ni scándíje ña. Te súcuan cuni tāca grupo ñayuu cá candíje jeē maá rí cúu Yaā jiní ndihí ndese cáa jeē níjnūní jíin ánuá ñayuu. Te cuāha ri yāhu in in ró núu ndese ni casáha ró. ²⁴ Te sava ga rō jeē cáyūcú ñuu Tiatira, jeē tu ní cájetáhú jnúhun stéén ñahan ún, ni tu ní cájni ró jnúhun jeē cácahān i jeē jnúhun sáhi gá Satanás cúu, jíin máá ró cahán rī jeē ma téē ga rī inga jniñu síquī rō. ²⁵ Chi máá-ni jeē na quéndōo nīhin ró jíin jnúhun ndaā cá candíje ró, te quendōo nīhin ró jíin ndé quivī ndíji ri. ²⁶ Tāca ñáyuu jeē cúndeyí síquī jeneé, jíin jéē squícu vāha jniñu cúní rī nde vijna te nde quivī sándihí, sáha ri jeē cujéhu i ndacu i jniñu nuū tācá nación, ²⁷ nájnūhun ni sáha Tátá rī jeē cujéhu ri ndácu ri jniñu. Te ndacu nīhin i jniñu nuū tācá nación. Te nájnūhun cún yúú i quísi tahu, súcuan squéhichī i ñayuu tu cájendetū nuū rī. ²⁸ Te sáha ri jeē coto i ruhū jeē luu cujéhu ri quenda ndijin rī, nájnūhun jíto i lucero jeē cáne cúndijin. ²⁹ Ñayuu iyó sóho na chúsóhó i jnúhun jeē cahán maá Espíritu Santo jíin tāca grupo ñayuu cá candíje. Achí yá.

*Jnūhun cuahān ñuu Sardis***3**

¹Te tee ró jnúhun yáha na quíhín nuū jeē cujéhnú nuū ñáyuu cá candíje ñuu Sardis: Súcuan cáhán ruhū, maá Yaā jeē névāha ndihúxá Espíritu Yaā Dios jíin ndihúxá quīmi. Je jíin rī tācá jniñu cásáha ró, te cácahān ñayuu jeē cátecu rō, te nuū rī chi nájnūhun ndīyí cácuu ró. ²Na nátahū ni rō, te ndejéé níhin ró jíin jniñu jeē jecu na iyó te ndúcú naa. Chi je jíin rī jeē tu squícu vāha vāha ró núu Yaā Dios. ³Te na núcūhun ni rō tāca jnúhun jeē ní castéén nuū rō. Te cuatáhú ró jnúhun ún te nacani ni rō síquī cuéchi ró. Chi núu tú natahū ni rō, te cuajeē rī nuū rō ñn sanaa-ni nájnūhun jeē ñn sanaa-ni te quíji ñacuīhná, te ma cúni rō na hora jinū rī nuū rō. ⁴Te vēsú súcuan te íyó nahín jecu rō ñuu Sardis jeē tu ní cásáha ró cuéchi, jeē cúu nájnūhun jeē tu ní sájnéhén ró sahma ró. Jeē yúcuan cuijín yaa coo sahma ró caca ró jíin rí, chi ñayuu vāha cácuu ró. ⁵Chi tāca ñáyuu jeē cúndeyí síquī jeneé, cuāha ri sahma cuijín yaa cuhun i. Te ma ndáhva rī síhví i nuū libro jeē yosó síhví ñáyuu cotecu ní cáni. Te cuajnúhún rí i nuū Tatá rī jíin núu tācá ndajéhé yā. ⁶Ñayuu iyó sóho na chúsóho i jnúhun jeē cahán maá Espíritu Santo jíin táca grupo ñayuu cá candíje. Achí yá.

Jnūhun cuahān ñuu Filadelfia

⁷Te tee ró jnúhun yáha na quíhín nuū jeē cujéhnú nuū ñáyuu cá candíje ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quívi ñayuu nuū ndácu

ri jniñu, te ni ñn ma cúu casi, te máá rí jési, te ni ñn ma cúu nune. ⁸ Je jíní rī tācá jniñu váha cásáha ró. Te ni nune ri nájnūhun ñn yéhyí quívicoo ró, te ni ñn ma cúu casi. Chi vésú jecu-ni fuerza rō iyó, te ni cacandíje ró jnúhun ri, te tu cájesi rō yuhu ró jéē cácandíje ró rúhū. ⁹ Te iyó sava ñayuu yíhi ndaha Satanás, te cácahān i jeē ñáyuu hebreo, jíin ñáyuu maá Yaā Dios cácuu i, te tuú chi cástáhú-ni i. Núu súcuan te sáha ri jeē jécōo i nuū rō te jecuiñi yití i nuū rō, te cuni i jeē maní rī jíin ró. ¹⁰ Te vāha ni casquícu ró jnúhun ní cahān rī jeē cuándeyí ni rō. Te jeē yúcuan jnama ri rohó quíví jeē quíji ñn jnūndóho xeēn síquí ñáyuu ní cáhnu ñayíví, jéē cóto ndee ún i jíināhan i. ¹¹ Te yachī ndiji ri. Núu súcuan te quendōo nīhin ró jíin jnúhun cácandíje ró, návāha ni ñn ma quénde premio rō. ¹² Tāca ñáyuu jeē cúndeyí síquí jeneé, sáha ri jeē cuu i nájnūhun sihñ yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhví Yaā Dios maá rí jneē i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí. ¹³ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácandíje. Achí yá.

Jnúhun cuahān ñuu Laodicea

¹⁴ 'Te tee ró jnúhun yáha na quíhín nuū jeē kujéhnu nuū ñáyuu cácandíje ñuu Laodicea: Súcuan cáhán ruhū, maá Yaā cúu jnúhun ndaā, Yaā cúu testigo vāha jeē cahán ndaā. Te máá rí ni sáha ndihí jeē ni cáhān Yaā Dios jeē na jécōo. ¹⁵ Je jíní rī tācá jniñu cásáha ró. Te cácuu ró nájnūhun jeē tú mījin ni tú jihní, cúu jeē jecu-ni cácandíje ró jnúhun ri,

te ni tu cájito uhū rō ni tu cándihvī ni rō siquī. Te nacā jeē váha núu jeē míjin ró chí jēē jihní ró nuú. ¹⁶ Te tuú chi máá yívíxī-ni ró, chí ni tu cájito uhū rō ni tu cándihvī ni rō siquī. Te jeē yúcuan squéhichī rī rohó nájñuhun ñn jeē tésīhi rí jeē séyūhu rí jeē tu nújnahan ni rī. ¹⁷ Te cácahān rō jeē cucá ró, te quéndōo vāha ró, te tu cúmanī ni ñn nuū rō. Te tu cásáha ró cuenta jeē cuécá lí cándoho ró, te ndáhú ndasí ró, te cácuáá ró, te máá ññ lí rō. Te tāca jēē yáha cúní cahān jeē tu cáccandíje vāha ró. ¹⁸ Núu súcuan te cáhán rī jíin ró jeē nuū rī cuaan ró oro jeē ni ndúhvā nuū ññuhún te ni nduu máá nene, te suu cúu jeē sáha rí jeē coo cucá ndije ró ndihí jeē ndíso jñuhun rí. Te nuū rī cuaan ró sahma cuijín cuhun ró, návāha tú cucanu rō jeē maá ññ lí rō, cúu jeē quéndōo ndaā rō sáha rí. Te cuaan ró tájnā nuū rī, quívi tññu ró, návāha ndundijin tññu ró, cúu jeē jecūhun ni rō jñuhun rí. ¹⁹ Tāca ñáyuu jeē cundáhú ni rī, chí cáhán rī nuū i te stóho rí i, návāha na chúhun ni i. Núu súcuan te na cóndihvī ni rō jíjnahan ró, te nacani ni rō jeē stóo ró cuéchi ró. ²⁰ Cuni sōho, chí íin rí yehyí ánuá rō te cáhán rī. Te núu ndé-ni róhó cuni sōho te nune ró yéhyí ánuá rō, te quívi rí caji rī staā jíin ró, te suni caji maá ró jíin rí. Te suu cúu jeē cóndee rī anuá rō. ²¹ Tāca ñáyuu jeē cúndeyí síquī jeneé, cuāha rí jñuhun conene i jíin rí nuū mesa nuū ndácu rí jniñu. Chi máá rí suni ni snáā rī poder jeneé, te ni cucōo rí jíin Tátá rī nuū mesa nuū ndácu ya jniñu. ²² Ñayuu iyó sóho na chúsohó i jñuhun jeē cahán maá Espíritu Santo jíin táca grupo ñayuu cáccandíje. Achí yá.

Tāca jēē cáyūcú andiví cáchiñúhún núu yā

4

¹ Yūcuán na te ni ndacoto ri, te ni jito ri jeē núne ñn yéhyí andiví, te máá Yaā jeē ni cáhān jíin rí jeē xíhna ñúhún, ni cahān tucu jíin rí nájñuhun jeē tívi trompeta. Te ni cahān:

Caa quiji ró yáha, te na stéén rī nuū rō tācá jniñu jeē cóo ichi núú gā, achí yá.

² Te máá Espíritu Santo ni scóto-ni ya ruhū. Te ni jito ri jeē andiví ñn ñn mesa nuū ndácu jniñu, te néne máá yá nuū mesa un. ³ Te máá yá jeē néne yūcuan cáa ya nájñuhun ndíndēé ñn yuū quiyi ndíí chí ñn yuū cuehé ndíí. Te ñn ticō vēhnde ní jicó ndúū yuhu mesa yā, te ndíndēe nájñuhun ñn yuū cuíí ndíí. ⁴ Te xiin mesa yā ni jito ri jeē ní jicó ndúū ocō cuūn gā mesa nuū ndácu jniñu. Te nuū mesa un néne ocō cuūn tēe jéhnū cándiso jniñu. Te cáñuhun de sahma cuijín yaa, te xinī de cáñuhun corona oro. ⁵ Te nde nuū mesa nuū ndácu ya jniñu ndíndēé taja te ññin te cáhān taja. Te ichi núú mesa yā ñn ndihúxá Espíritu Yaā Dios, jeē cáa nájñuhun uxā yiti náhnū jeē cayú ñuhūn. ⁶ Te ichi núú mesa yā ún suni íyó nájñuhun ñn mar jeē jíto quiyi nájñuhun vidrio.

Te xiin mesa yā un ní jicó ndúū cuūn jeē técu. Te íyó cuéhē tinūu ññí cáhnū ichi núú jíin ichi yátá un.

⁷ Te ñn jeē técu un cáa nájñuhun ndicaha. Te ñnga cáa nájñuhun stiꞑuī. Te jeē uní chí nēe nuū tēe. Te jeē cuūn chí cáa nájñuhun yaha chócó jēe jicó núū tachí. ⁸ Te ndicúún jeē técu un íyó íñū ndijēn jeē ñn ñn. Te máni máá tinūu cúu ññí cáhnū nde jíin ññí chíji ndijēn. Te nduú ñuú tu jécuiñī cuiiti jeē cahán:

Yaā ñ Yaā ndoo ndasí
cúu máá Jítoho yō Yaā Dios, Yaā jññí ndihí poder,

Yaā iyó vijna, te ni īyo yá ní cáni, te coo ya ní cáni. Achí.

⁹ Chi máni jeē cácahān ndicúún un jéē cujéhnu ndasí máá Yaā jeē néne nuū mesa, Yaā jeē técu ní cáni cuiti. Te yíñúhún cácahān un jín yá, te nácuatáhú núū yā. ¹⁰ Te tāca jínu jeē casáha súcuan, te ndihócó cuūn tēe jéhnu cándiso jníñu, cájecuñí yití de nuū Yaā jeē técu ní cáni cuiti, cáchiñúhún de ya. Te cástáa de corona de, cájequin de ichi núú jehé mesa yā. Te cácahān de:

¹¹ Jitoho ná te Yaā Dios na cúu ní.

Te vāha ndasí Yaā cúu ní jéē cácahān i jeē luu cújéhnu ní,
te cáhīyo yíñúhún i nuū ní, te jní ní ndihí poder.
Chi máá ní ni sáha ndihí jeē iyó,
te siquí jeē súcuan ni cuu ni maá ní te ni jecōo ndihí.
Achí de jínáhan de.

Jeē ní nune Londe Yaā Dios tutu

5

¹ Yūcuán na te ni jito ri jeē Yaā néne mesa jeē ndácu jníñu, ndaváha ya jní ya ñn tutu cáni jeē ní tuu. Te yósó jnúhun ndindúú lado tutu ún, te ndíhyú jín úxā sello. ² Te ni jito ri ñn ndajéhé yā jeē ndiso poder, te ni cahān jee:

¿Ndé ñn cúu tēe vāha ndasí jeē cóndiso jníñu cahnde sello te nune tutu yáha? áchí ndajéhé yā.

³ Te ni andiví ni ñayiví ni jeē iyó chíji ñayiví, tu ní íyo ni ñn jeē cóndiso jníñu nune tutu ún, ni jeē cóto nuū. ⁴ Te ni ndahyū ndasí rí, chí tu ní íyo ni ñn jeē cóndiso jníñu nune te cahu tutu ún, ni jeē cóto nuū.

⁵ Yūcuán na te ni cahān ñn tēe jéhnu un jín rí:

Ma ndahyú rō, chi íyó ñn Yaā ndíso jníñu jeē cahnde yā ndihúxá sello ndihyú tutu, te nune ya. Te máá yá chi íyó cuéhē poder yā, nájñuhun jeē iyó cuéhē fuerza ñn ndicaha. Te ni cacu ya chīji yucūn Judá, jeē cúu yucūn rey David. Te ni snāā yā poder tāca jéneé.

⁶ Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un ín ya nuū ín mesa Yaā Dios, mēhñú ndicúún jeē técu, jíin téē jéhnu cándiso jníñu. Te íyó úxā ndiqui jíin úxā tinūú Londe ún. Te tinūú un cúu ndihúxá Espíritu Yaā Dios jeē ní tají yá ni jengoo ní cáhnu ñayiví. ⁷ Te Londe un ní jequihin ya tutu jeē jnñ ndaváha Yaā jeē néne nuū mesa. ⁸ Te ná ni quihin ya tutu ún, te ndicúún jeē técu jíin ndihócó cuūn tēē jéhnu cándiso jníñu, ni cajecuiñi yití núu yā. Te ná ñn ná ñn tēē jéhnu un cándaha yaa jeē naní arpa, jíin cóhō cūu oro jeē ñuhun chitú súje cutú. Te sūje cutú un cúu máá táca jnúhun jeē cájicān tahuñayuu yñi ndaha Yaā Dios. ⁹ Te ni cajita de ñn yaa jeé, te suhva cáhán:

Vāha ndasí Yaā cúu ní jéē quihin ní tutu te cahnde ni sello jeē ndihyú.

Chi ni cajehni i níhín, te jíin níñi ni ní nacuaan ní ñayuu

mēhñu táca raza, tācá yuhu, tācá ñuu, tācá nación, návāha cuu i ñayuu Yaā Dios.

¹⁰ Te ni sáha ní jéē cuu i rey jíin sūtū nuū Yaā Dios, te ndacu i jníñu ini ñayiví.

Achí de cájita de.

¹¹ Te ni jito ga rī, te ni jini sōho ri jeē cácahān cuehē ndajéhé yā jeē ní cajicó ndúū xiin mesa yā, jíin xiin ndicúún jeē técu, jíin xiin tēē jéhnu cándiso

jniñu. Te íyó cuéhē ndasí millón ndajéhé un. ¹² Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuan jní ya poder, te yōhyo cúcá yá,

te yōhyo ndíchí yá, te ndíso ya cuehē fuerza,

te cáhīyo yíñúhún ndihí nuū yā, te luu cújéhnú ya,

te cácahān i jeē váha ndasí Yaā cúu ya.

Achí.

¹³ Te suni ni jini sōho ri jeē cácahān ndihí jeē ni sáha Yaā Dios jeē iyó ini andiví jíín ini ñayīvi jíín chíji ñayīvi jíín ini mar. Te ndivii un ní cacahān:

Cúsī ni yō cahán yō jeē yóhyo vāha Yaā cúu máa Yaā néne mesa nuū ndácu ya jniñu,

jíín Yaā cúu Londe Yaā Dios.

Te na cóo yíñúhún yó núū yā, chí cújéhnú luu ya,

te jní ya poder ní cáni cuiṭi.

Achí.

¹⁴ Te ni cacahān ndicúún jeē técu:

Súcuan na cóo, áchí.

Te ndihóco cuūn tēe jéhnú cándiso jniñu ni cajúcuñī yití de, te ni cachiñúhún de nuū Yaā jeē técu ní cáni cuiṭi.

Siquī ndihúxá sello

6

¹ Yūcuán na te ni jito ri jeē Yaā cúu Londe Yaā Dios, ni jehnde yā ñn jeē uxá sello un. Te ni jini sōho ri jeē cahán ñn jnáhan ndicúún jeē técu ún, nájnūhun cáhán taja:

Nehen te cuni rō.

² Te ni ndacoto ri, te ni jito ri ñn caballo cuijín. Te jeē yosó síquī tī un ndáhá ñn arco jeē stáva nduva.

Te ni jecūhun ñn corona xinī. Te ni quenda ni jejnáhan, te ni cundeyí síquī ndihí.

³ Yūcuán na te Londe un ní jehnde yā sello uū. Te ni jini sōho ri jeē cahán inga jnáhan ndicúún jeē técu:

Nehen te cuni rō.

⁴ Te ni quenda ñn caballo cuehé, te jeē yosó síquī tī ndíso jníñu jeē snáā jnūhun cáyūcu mánī ñayuu ñayīví, te quejéé i cahni jnáhan i. Te ni nihīn ún ñn espada cáhnu.

⁵ Yūcuán na te Londe un ní jehnde yā sello unī. Te ni jini sōho ri jeē cahán inga jnáhan ndicúún jeē técu:

Nehen te cuni rō.

Te ni ndacoto ri, te ni jito ri ñn caballo jnuú. Te jeē yosó síquī tī ndáhá ñn balanza jeē chícuāha, chí coo jnamā xeēn. ⁶ Te mēhñú ndicúún jeē técu un ní jini sōho ri ñn jeē cahán:

Máá ñn kilo-ni trigo nihīn i jíin yáhu i jeē sájniñu i ñn quivī. Te núu cebada, te unī-ni kilo nihīn i jíin yáhu i jeē sájniñu i ñn quivī. Te aceite jíin vino chí ma sáha ró jeē cúmanī. Achí.

⁷ Yūcuán na te Londe un ní jehnde yā sello cuūn. Te ni jini sōho ri jeē cahán tucu inga jnáhan ndicúún jeē técu:

Nehen te cuni rō.

⁸ Te ni ndacoto ri, te ni jito ri ñn caballo cuaán yaa, te jeē yosó síquī tī cúu máá cuéhyī jéhni ñayuu. Te ichi yátá un ndíquin máá jnúhun jeē quivī ñayuu lugar nuū cáyūcu ánuá ndīyí. Te ndīndúú un cándiso jníñu jeē ndóna síquī ñn jeē ndicúún parte ñayīví, te cuu sáha jeē cúu ñayuu jíin guerra, jíin

jnámā, jín cuéhyī xeén, jín táca quiti xeén jeē iyó ñayīví.

⁹ Yūcuán na te Londe un ní jehnde yā sello uhūn. Te chīji altar cáhnu ni jito ri anuá ñayuu jeē ní cacandíje jnūhun Yaā Dios te ni canacani ndaā i jnūhun ya, te siquī yūcuan ní cajehni ñayuu i. ¹⁰ Te ni cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéē ni jéjnūhun ní. ¿Te nasaa ga tiempo coo te sándaā ni jéhē ná, te nacuaāha ní jéē ndútahū ñayuu ñayīví jéē ní cajehni sãñá? áchí.

¹¹ Yūcuán na te ni jēhe ya sahma cuijín cuhun i jijnáhan i, te ni cahān yā jín i jeē na ndétátú i jecu gā tiempo. Chi iyó gá hermano i jeē cájejniñū nuū yā, jeē suni jini ñúhún cuu i návāha jīnu número i, áchí yá.

¹² Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnúú níāndii nájnūhun ñn sahma jnúú. Te ní yóō ni nduu nájnūhun niñí. ¹³ Te quīmi andiví ní ñngoyo nuū ñúhun nájnūhun ñngoyo ndehē yīhí yujnu higo sáha tachī níhin. ¹⁴ Te andiví ní cujiyo cuahān nájnūhun jeē nátuu ñn tutu cáhnu. Te tācá yucu jín táca isla ni cujiyo cuangoo inga lado. ¹⁵ Te tāca rey ñayīví, jín jéē cácujuhnu, jín jéē cucá, jín táca capitán, jín jéē cándiso poder, jín mozo jeē ní cajeen ñayuu, jín téé cásajniñū cuenta maá, ní cachisāhi máá ini yaū cava jín méhñu cava chīji yucu. ¹⁶ Te ni cacahān i jín yucu jín cava:

Ndicó cáva siquī rī, na quisāhi rí návāha tú coto máá Yaā néne mesa ndácu jniñū, jín Yaā cúu Londe jeē cuáha ya castigo xeēn ruhū. ¹⁷ Chi ni quee maá

quívī cáhnu jeē cuáha ya castigo, ¿te ndé ñn canda condichi nuū yā? achí i jínáhan i.

Ñayuu tāca yúcūn Israel jeē ni jécondee sello jneē

7

¹ Te ná ni cuu jniñu yáha, te ni jito ri cuūn ndajéhé yā jeē cáhīn ndicúún lado ñayīví. Te cájesi yā nuū ndicúún tachī, návāha ma quéé nuū ñúhun ni nuū mar ni nuū ní ñn yujnu. ² Te suni ni jito ri inga ndajéhé yā, vēji ichi núū cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúún ndajéhé un jéē ndíso jniñu jeē sáha daño nuū ñúhun íchi jíin núū mar:

³ Ma sáha ró daño nuū ñúhun ni nuū tācá yujnu ni nuū mar, chi nde na téé yó sello jneē tāca ñáyuu cájejniñu nuū Yaā Dios yō.

⁴ Te ni jini sōho ri jeē achí jéē iyó ciento uū xico cuūn mil ñayuu jeē ni jécondee sello jneē. Te ñayuu un cácuu tāca yúcūn ñayuu Israel. ⁵ Te iyó úxī uū mil ñayuu cácuu yucūn Judá jeē ni jécondee sello, jíin úxī uū mil yucūn Rubén, jíin úxī uū mil yucūn Gad, ⁶ jíin úxī uū mil yucūn Aser, jíin úxī uū mil yucūn Neftalí, jíin úxī uū mil yucūn Manasés, ⁷ jíin úxī uū mil yucūn Simeón, jíin úxī uū mil yucūn Leví, jíin úxī uū mil yucūn Isacar, ⁸ jíin úxī uū mil yucūn Zabulón, jíin úxī uū mil yucūn José, jíin úxī uū mil yucūn Benjamín. Ndihi yucūn yáha cúu jeē ni jécondee sello.

Ñayuu cuehē jeē cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehē ndasí ñáyuu. Te cúu i ñayuu tācá nación jíin tāca raza jíin táca yuhu jíin táca ñuu. Te cáhīn i nuū

mesa nuū ndácu Yaā Dios jniñu jíin núu maá Yaā cúu Londe. Te siquī jeē cuehé ndasí i, te ni ñn ma cúu cahu nasaa i cúu. Te cáñuhun i sahma cuijín, te cándāhá i ñuū. ¹⁰ Te ni cacana jee i:

Yaā Dios maá yó cúu jeē ní jnama yóhó,
Yaā jeē néne nuū mesa jeē ndácu jniñu,
jíin Yaā cúu Londe Yaā Dios.

Achí i jíjnáhan i. ¹¹ Te ndihi ndajéhé ni cajicó ndúu yā cáhīn ya xiin mesa Yaā Dios, jíin xiin tēe jéhnú cándiso jniñu, jíin xiin ndicúun jeē técu. Te ni cajecuiñi yití yá ni cachiñúhún yá Yaā Dios ichi núu mesa yā. ¹² Te ni cacahān yā:

Amén. Cúsī ni yō cahán yō jeē yóhyo vāha Yaā cúu
Yaā Dios maá yó.

Te luu cújéhnú ya te ndíchí yá.

Te na nácuatáhú yó nuū yā, te na cóo yíñúhún yó
núu yā.

Chi jnái ya poder, te ndíso ya cuehé fuerza jeē ní
cáni cuiñi. Amén.

Achí táca ndajéhé yā.

¹³ Yūcuán na te ni cahān ñn tēe jéhnú un jíin rí:

¿Ndé ñáyuu cúu yāha jéē cáñuhun sahma cuijín, te
ndé chi véjicoo i?

¹⁴ Te ni cahān rí jíin de:

Máá ní cúu jeē jiní, Tátā.

Te ni cahān de jíin rí:

Yāha cácuu ñayuu jeē ní cayāha i jeē ní cajito i
jnūndóho xeēn. Te ni canacate i sahma i jíin níñi
maá Londe, te ni nduyaa vāha, cúu jeē ní ndundoo
ánuá i ni sáha ya. ¹⁵ Jeē yúcuán cúu jeē cáhīn i nuū
mesa nuū ndácu Yaā Dios jniñu, te cájejniñu i ini
templo yā nduú ñuú. Te Yaā jeē néne nuū mesa,
coto ya i jeē quéndōo vāha i nuū yā. ¹⁶ Te ma cúu

gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní. ¹⁷ Chi máá Yaā cúu Londe jeē néne nuū mesa jeē ndácu jniñu, coto ya i nájñuhun jeē cúu i lanchi ya. Te condeca ya i quihIn yā jíin i nuū cáne ndute jeē cótecu i sáha. Te Yaā Dios nacuaa yā ndute núu i jíjnáhan i, te ma ndahyú gā i. Achí téé jéhnú ún.

Siquí sello uxā jíin cóhō cūu oro

8

¹ Te Londe un ní jehnde yā sello uxā jeē ndihyú tutu ún, te nayúú-ni ni iyo ini andiví nájñuhun sava hora. ² Te ni jito ri ndihúxá ndajéhé jeē cáhīn nuū Yaā Dios. Te ni cajēhe uxā trompeta nuū ndajéhé un. ³ Yūcuán na te ni quee inga ndajéhé, ndáhá yá ñn cohō cūu oro, te ni jecuiñi yā nuū altar. Te ni jēhe cuehē sūje cutú núu yā, návāha socō yā jíin jnúhun cájicān tahu ndihi ñayuu cácandíje Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. ⁴ Te nuū cohō cūu jñi ndajéhé un ní cane ñuhmā sūje cutú, ni caa nuū Yaā Dios nde jíin jnúhun cájicān tahu ñayuu cácandíje Yaā Dios. ⁵ Yūcuán na te ni quihin ndajéhé un cóhō cúu un. Te ni scutú yá tīcua ñuhūn jeē cayú nuū altar. Te ni jete yā nde ini ñayiví. Te ni sáha jeē ni cáhān taja, te ni ñihin, te ni ndindēé taja, te ni jñāa.

Jnúhun siquí trompeta

⁶ Yūcuán na te ndihúxá ndajéhé jeē cándāhá ndihúxá trompeta, ni casátūhva ya jeē tiví yā.

⁷ Te ndajéhé ñn ni tiví yā trompeta. Te ni cuun ñíñi ini ñayiví jíin ñuhūn jeē ni sácā núu jíin níñi. Te

ni cayū ñin jeē uní parte ñayīví, jíin ñin jeē uní parte yujnu, jíin ñin jeē uní parte ite cuí.

⁸ Te ndajéhé uū ni tiví yā trompeta. Te ñin nájnūhun ñin yucu cáhnu jeē cayú ñuhūn ni ñingava cuahān nuū mar. Te ñin jeē uní parte mar ni nduu niñī. ⁹ Te ni jihī ñin jeē uní parte quití ñūhun nuū mar. Te ni naa cuehē barco, chí ñin ñin jeē tāca únī ni naa.

¹⁰ Te ndajéhé unī ni tiví yā trompeta. Te ni ñingava ñin quīmí cáhnu ichi ándiví, te cáyú nájnūhun cáyú ñin yití cáhnu. Te ni ñingava siquī ñin ñin jeē tāca únī yūte jíin núū cáne ndute. ¹¹ Te quīmí un nání quīmí uvuā. Te ñin jeē uní parte ndute ni cuu uvuā. Te ni cajihī cuehē ñayuu ni sáha jeē ní cuu uvuā ndute ún.

¹² Te ndajéhé cuūn ni tiví yā trompeta. Te ñin jeē uní parte niāndii jíin yóō jíin quīmí ni tiví. Te ni ndunee ñin jeē uní parte i, te tuá ni cúndijin ñin jeē uní parte nduú jíin ñuú.

¹³ Te ni ndacoto ri, te ni jini sōho ri jeē cána jee ñin ndajéhé yā jeē ndáva cuahān sava andiví:

Nacā xeēn gā ndoho ñayuu cáyūcú ini ñayīví, chí je yajni cuecu unī gā trompeta jeē tiví unī gā ndajéhé, achí yá.

9

¹ Te ndajéhé uhūn ni tiví yā trompeta. Te ni jito ri jeē ichi ándiví ní ñingava ñin quīmí nde ini ñayīví. Te nuū quīmí un ní jēhe ndacáa jeē nūne túhnchi cúnú ndasí. ² Yūcuán na te ni nune un túhnchi, te ni cane ñuhmā ni caa nájnūhun ñuhmā ñin ijnū cáhnu. Te ñuhmā un ní sáha jeē ní cunee niāndii jíin ní núū tachí. ³ Te nuū ñuhmā un ní canecoo tíca ndicuéhyí,

ni jitē núu ti ní cáhnu ñayīvī. Te ni jēhe ya jnūhun jeē sāha ti nájnūhun cásáha tīsuhma xeēn jeē iyó ini ñayīvī. ⁴ Te ni ndacu ya jniñu nuū tī jeē ma sāha ti dañō ite jíin yúcū cuí jíin yujnu, chi máni ñayuu jeē tu ndéé sello Yaā Dios jneē i cúu jeē tuu tī. ⁵ Te tu ní jēhe ya jnūhun jeē cáhni tī ñayuu, chi máni jeē stóho tī i uhūn yoō. Te sāha tī jeē jetú i nájnūhun jeē jetú ñayuu jeē túu tīsuhma i. ⁶ Te quiṽī ún nducú ndasí ñayuu modo cuu i, te ma nihín i modo. Te vēsú cuní i cuu i, te tú na modo cuu i.

⁷ Te tíca ndicuéhyí un cáa tī nájnūhun caballo jeē cáhīyo tūhva quingoo nuū cuájnaħan. Te xinī tī ñūhun nájnūhun corona oro. Te née tī nuū téé. ⁸ Te iyó ixi tī jeē cáa nájnūhun ixi xíní ñahan. Te jnūhun tī cáa nájnūhun jnūhun ndicaha. ⁹ Te ní tī ndihyú nájnūhun sahma cáa. Te níħin ndijēn tī nájnūhun níħin jeē cuángoo cuehē caballo nuū guerra cáñuhun tī carreta. ¹⁰ Te suhmā tī ndíso iñu nájnūhun tīsuhma. Te jíin súhmā tī cuu stóho tī ñayuu uhūn yoō. ¹¹ Te iyó ĩn jeē cujéħnu nuū tī, te suu cúu ndajéhé jexeén jeē ndító tūħnchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéē snāa.

¹² Je ni yāha ĩn jnūndóho, te iyó úū gā jnūndóho jeē quíji.

¹³ Te ndajéhé iñū ni tivī yā trompeta. Te ni jini sōho ri ĩn jnūhun jeē ní cahān nde mēħñú ndicúún yiquī altar oro jeē ín nuū Yaā Dios. ¹⁴ Te ni cahān un jíin ndajéhé iñū jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufrates, achí.

¹⁵ Te ni nandajī ndicúún ndajéhé un, návāha cahni ñn jeē uní parte ñayuu ñayiví. Chi je cáhīyo tūhva ndajéhé un jeē siquí maá hora jíin quívī jíin yóo jíin cuiyā jeē cóo súcuan. ¹⁶ Te ni jini sōho rī jeē achí jéē iyó úū ciento millón soldado jeē cáyoso caballo.

¹⁷ Te ni steén gā yā nuū rī, te ni jito ndijin rī tācá caballo. Te tēe cáyoso siquī tī cáñuhun de camisa cāa jeē cuehé, jeē ndeé, jíin jéē cuaán. Te xinī caballo un cándāa nájnūhun xinī ndícaha. Te yuhu tī quénda ñuhūn jíin ñúhmā jíin azufre. ¹⁸ Te jíin únī jeē quénda yuhu caballo un, te ni jihī ñn jeē uní parte ñayuu, suu jíin ñúhūn jíin ñúhmā jíin azufre. ¹⁹ Chi yuhu tī jíin súhmā tī iyó fuerza jeē cáhni tī ñayuu. Chi suhmā tī cándāa nájnūhun coō, te iyó xínī, te jíin yúcuan stóho tī ñayuu.

²⁰ Te sava ga ñayuu jeē tu ní jhí jíin táca jnúndóho yáha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhún i táca táchī jíin ídolo jeē ní cuvāha jíin oro jíin plata jíin cáa cuaán jíin yūū jíin yujnu. Te tācá un chi tu cúu coto, ni tu cúu cuni sōho, ni tu cúu caca. ²¹ Te ni tu ní cánacani ni i stóo i jeē jéhni i ndiyí, jíin jéē satásí i, jíin jéē jíca jnéni i, jíin jéē sacuíhná i.

Ndajéhé jeē ndahá libro lulí

10

¹ Te ni jito ri ñnga ndajéhé yā jeē ndíso poder, ni cuun ya ichi ándiví. Te ñúsúcún yá vicō, te xinī yā ñúhun ticō vėhndé. Te nuū yā ndíndēe nájnūhun niāndii, te sīhīn ya cáa nájnūhun uū sīhīn jeē cáa ná cáa ñuhūn. ² Te ndahá yá ñn libro lulí jéē núne. Te

ni jeni ya jehē váha ya nuū mar, te jehē jecó yá nuū ñúhun íchi. ³ Te ni cana jee téyí yá, nájñūhun jeē ndahyú ndicaha. Te ná ni cana jee ya, te ni cacahān uxā taja. ⁴ Te ná ni cacahān uxā taja, te je íyó túhva ri jeē tée ri jñūhun un núú. Te ni jini sōho ri ññ jñūhun ichi ándiví jeē ni cáhān jíin rí:

Chuvāha ró táca jñūhun jeē ní cacahān uxā taja ún, te ma steén rō, ni ma tée ró, áchí.

⁵ Yūcuán na te ndajéhé jeē ní jito ri jeē íin nuū mar jíin núú ñúhun, ni ndonehen ya ndaha váha ya ichi ándiví. ⁶ Te ni ndacunehen ya síhví máá Yaā jeē técu ní cáni, Yaā ni sáha andiví jíin ñáyiví jíin mar jíin táca ndíhi jeē iyó ini. Te jíin síhví yá un ní cahān teyí ndajéhé:

Ma cucuéeé gá jeē jínu ñáyiví. ⁷ Chi núu na quéjéé ndajéhé uxā tiví yā trompeta, yūcuán na te squícu-ní Yaā Dios jñūhun sáhi yá, nájñūhun ni castūhun yá nuū táca mozo yā, tée ni canacani jñūhun ya nde jenahán, áchí ndajéhé.

⁸ Yūcuán na te máá jéé ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jéé núne jeē ndahá ndajéhé jeē íin nuū mar jíin núú ñúhun, áchí.

⁹ Te ni jehēn rī nuū ndajéhé un, te ni jicān rī jeē na cuáha ya libro lulí un núú rī. Te ni cahān yā:

Quihin te caji rō. Chi vixī sáha ini yuhu ró nájñūhun ndūxi, te chīji ró chi cuhiyá sáha, áchí yá.

¹⁰ Yūcuán na te ni quihin ri libro lulí jeē ndahá ndajéhé yā, te ni yeji rī. Te vixī ni sáha ini yuhu ri nájñūhun ndūxi. Te ná ni cuu ni yeji rī, te ní jité iyá ni rī. ¹¹ Te ni cacahān jíin rí:

Cánuú jéē nacani tucu ró jnúhun Yaā Dios, ndese coo siquī ñayuu cuehē ñuu jíin cuéhē nación jeē sín sín yuhu, jíin síquī cuehē rey cándacu jniñu, áchí jíin rí.

Siquī uū testigo yā

11

¹ Yūcuán na te ni cajēhe ñin yujnu nuū rī, jeē cúu ñin cūhva jeē chícuāha. Te ni cacahān jíin rí:

Ndocuiñī te chīcuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núu yā yūcuán. ² Te ma chícuāha ró patio yatā templo. Chi je ni jēhe ya nuū ñáyuu tācá ñuu jicá. Te coyūcú i ini ñuu ñi yāhá, te uū xico uū yoō cueñū i síquī ñuu. ³ Te tají rí uū testigo rī jeē nácani jnúhun rí mil uū ciento unī xico quiṽī. Te cuhun de sahma ndáyí jéē cácuquíhyá ni de síquī cuéchi ñayuu, achí yá.

⁴ Te ndindúú testigo un cúu nájñuhun ndindúú yujnu olivo jíin ndindúú candelero jeē ín nuū Yaā Dios, Yaā chíí ñayīṽí. ⁵ Te na-ni ñayuu núu nducú sáha ndevāha jíin ndindúú testigo un, te quenda ñuhūn yuhu ndindúú de, te cayū ndihī ñayuu cájito uhū i de. Te sūcuan cuu tāca ñáyuu jeē nducú sáha ndevāha jíin de. ⁶ Te íyó poder ndindúú testigo un jéē cásí de jeē ma cúun saū ní tiempo jeē nácani de jnúhun ya. Te suni íyó poder de sáha de jeē nduu niñī tācá ndute. Te cuu stíṽí de ñayīṽí jíin ndinuū jnúndóho, núu nasaa jínu cáconi de. ⁷ Te ná ni jínu ni canacani de jnúhun ya, yūcuán na te quenda quiṽí xéén jeē néne tūhñchi ún. Te cuajnáhan jíin ndindúú de, te cundeyí jíin de, te cahni de. ⁸ Te ndīyí ún

cava nuū yáhu ñuu cáhnu nuū ní cajehni i máá Jítóho yō jicā cruz. Te ñuu un cacahān yatá i jeē ñuu Sodoma jíin Egipto cúu, siquī jeē xeēn cuēchi íyó ñuu ún. ⁹ Te ñayuu tācá ñuu, tāca yúcūn, tācá yuhu, tācá nación, chí coto i jeē cáva ndindúú ndíyí un únī quiṽī yosáva, te ma cuáha i jnūhun jeē quíndūji. ¹⁰ Te ñayuu ní cáhnu ñayīṽí cusī ndasí ni i jeē ní cajihī de, te sáha i vico, te cuāha i regalo nuū jnáhan i. Chí ndindúú tée ni canacani jnūhun ya ún, ní casáha de jeē ní candoho ndasí ñáyuu ñayīṽí. ¹¹ Te jeē yáha unī quiṽī yosáva ún, te Yaā Dios sáha ya jeē nastáa tachī de, te ndonda-ni de. Te yūhú ndasí ñáyuu coto i jeē ní canatecu de. ¹² Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhū i de. ¹³ Te máá hora un jnáa ndasí, te ndicó cáva naa ñn jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhnu Yaā Dios jeē ndeé andiví.

¹⁴ Súcuan yāha jnūndóho uū, te yachī coo jnūndóho unī.

Siquī trompeta uxā

¹⁵ Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayīṽí je ni nuquihi ndaha máá Jítóho yō Yaā Dios

jíin Cristo jeē ní tají yá.

Te ndacu ya jniñu ní cáni cuiṽi.

Achí.

16 Yūcuán na te ndihóco cuūn tēe jéhnū cándiso jníñu jeē cánene de mesa de ichi núú Yaā Dios, ni cajecuiñī yití de, ni cachiñúhún de ya. 17 Te ni cacahān de:

Na cútahū na núū ní, Tátā Yaā Dios,
chi máá ní jnīi ndihī poder,
te cúu ní Yaā iyó vijna, te ni īyo ní nī cáni, te coo ní
nī cáni.

Te ni najnīi ní ndivii jeē iyó,
te jín poder ni ní quejéé ní ndácu ní jniñu nuū.

18 Ñayuu tācá nacióon ni caquītī ni i siquī ní.

Te vijna chi ni quee quivī jeē cuáha ní castigo i,
jín jéē sándaā ní jniñu tāca ndíyī.

Te cuáha ni táhū nuū tāca mozo ni jéē ní canacani
jnūhun ní,

jín núū tāca ñayuu cájejniñu nuū ní, jín ñayuu
cachiñúhún núū ní,
cúu ñayuu cácujehnū jín jéē tuú.

Te vijna te snáhnú ndetū ni ñayuu castívī ñayiví.

Achí de jínáhan de.

19 Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan íne yejnū jeē ñúhun contrato yā. Te ni ndindéé taja, te níñin, te cáhán taja, te ni jnāa, te ni cuun xeēn ñiñí.

Jnūhun ñahan jín cóo cáhnu

12

1 Yūcuán na te ini andiví ní cane ñin jeē nahán náā ni yō jito yó: ñin ñahan jeē ñúhun ña niándii nájnūhun sahna, te ín jehē ña siquī yoó, te ñúhun ñin corona xinī ña jeē ndeé uxī uū quimi. 2 Te ñúhun sēhe ña. Te ni ndahyū cohó ña jeē ndóho ña jéhnde chíji ña jeē scácu ña i. 3 Yūcuán na te ini andiví ní

cane tucu inga jeē náā ni yō jíto yó: ĩn coō cuehé cáhnu ndasí. Te iyó úxā xinī tī jíin úxī ndiqui tī. Te ndihúxá xinī tī ñúhun corona. ⁴ Te jíin súhmā tī ni stáa tī ĩn jeē uní parte quĩmi jeē iyó andiví, te ni síngoo tī ini ñayiví. Te ni ine tī nuū ñáhan jeē scácu sēhe ún, ndétu tī cocó tī sēhe ña jeē jé yajni cacu i. ⁵ Te ni scácu ña ĩn sēhe yí, te sūchi un ní jeconaā jeē ndácu ñihin i jniñu nuū ndívii nación. Yūcuán na te ni ndoñúhún séhe yí ña ún, ni ndaa i cuahān i nde nuū ín mesa Yaā Dios nuū ndácu ya jniñu. ⁶ Te ñahan un ní jinu ña cuahān ña nde nuū ñúhun téhé núu iyó ĩn lugar jeē ni sátúhva Yaā Dios. Te yūcuán condee ña nihĩn ña jeē cáji ña mil uū ciento uní xico quiví.

⁷ Yūcuán na te ni cajejnáhan ini andiví. Chi ndajéhé jéhnu ga jeē naní Miguel jíin táca ndajéhé jeē cácuu mozo nuū yā, ni cajejnáhan jíin cóo cáhnu. Te coō un jíin táca ndajéhé maá, ni cajejnáhan jíin yá. ⁸ Te tu ní cácundeyí tī, te tuá ní cúu coyūcu tī andiví. ⁹ Súcuan ni cuu jeē ní quenehen ya coō cáhnu un jéē iyó ndé jenahán ndasí. Te nání tī jexeén jíin Satanás, te máá tī cúu jeē stahú ndihi ñayuu ñayiví. Te ni scáne ya tī nde ini ñayiví jíin táca ndajéhé tī.

¹⁰ Yūcuán na te ni jini sōho ri ĩn jnūhun jeē cahán jee ichi ándiví:

Je ni quee quiví jeē jínu jnama ya yohó, jíin jéē steén ndijin yā jeē jnĩ ya poder, jíin jéē ndácu ya jniñu, jíin jéē ndíso jniñu máá Cristo jeē ní tají yá. Chi je ni quenehen ya maá jéē cahán cuēchi siquĩ tācá hermano yō. Chi nduú ñuú ni cahān cuēchi siquĩ i nuū Yaā Dios maá yó. ¹¹ Te ni cacundeyí i siquĩ Satanás un, ní sáha jnūhun jeē ni jíhĩ Yaā cúu

Londe, jíin jéē ní cacahān ndaā i jnūhun Yaā Dios, jíin jéē tu ní cundáhú ni i máá i, chi ni jēhe i jnūhun candíje i vēsú núu cuu i jeē siquí yā. ¹² Núu súcuan te na cúsi ndasí ni tāca róhó jéē cáyūcú andiví. Te nacā xeēn ndoho tāca róhó jéē cáyūcú ini ñayiví jíin núu mar. Chi ni cuun jexeén ni jinū nuū rō jijnáhan ró. Te quítí xeēn ni, chi jíiní jeē tuá coo cuehē gā tiempo jeē stahú ñayuu. Achí.

¹³ Te ni jini coō cáhnu ún jéē ni scáne ya maá cuáhān ini ñayiví, te ni jinu ti jíin ñahan ní scácu sēhe yí, jeē xeēn sáha ti jíin ña núu. ¹⁴ Te ni cajēhe uū ndijēn yaha chócó cáhnu nuū ñahan ún, návāha ndava ña quihīn ña lugar ña nuū ñúhun téhé, te cācu ña nuū coō ún. Te yūcuán condee ña unī cuiyā yosáva, te nihīn ña jeē cáji ña. ¹⁵ Te yuhu cóo un ní cane ndute nájnūhun in yūte cáhnu, cuahān yatā ña návāha jneni ña. ¹⁶ Te máá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún. ¹⁷ Yūcuán na te xeēn ni quítí ni coō cáhnu ni jito ti ña. Te cuahān tí cuajnáhan ti jíin táca gá sēhe ña, suu ñayuu casquícu jniñu ndácu Yaā Dios te cácandíje vāha i jnūhun Jesucristo.

Jnūhun siquī uū quítí xéén

13

¹ Te ni indichi rī yumár. Te ni jito ri jeē ní cane in quítí xéén ini mar. Te íyó úxā xinī tí jíin úxī ndiquí tí. Te ndihúxí ndiquí tí ñúhun corona. Te ndihúxá xinī tí ndeé in síhví néé jéē quítí ni Yaā Dios sáha. ² Te quítí xéén jeē ní jito ri ún, cáa ti nájnūhun cuiñí, te ndaha ti cáa nájnūhun ndaha oso, te yuhu ti cáa

nájñūhun yuhu ndácaha. Te nuū quitī un ní jēhe coō cáhnu poder maá jíñ mesa nuū ndácu máá jñiñu. Te ni sáha jeē cujéñnu ndasí quitī ún. ³ Te ni jito ri jeē ni tújī ññ xinī tī, jeē jé yajni cuu tī nuú. Te ni nduvāha ti jeē ni tújī tī. Te nahán ní naa ni ñayuu ñí cáhnu ñayīvī ní jito i, te ni cajetáhú i nuū tī. ⁴ Te ni cachiñúhún i coō cáhnu siquī jeē ni sáha ti jeē cujéñnu ndasí quitī xéén un, te suni ni cachiñúhún i quitī xéén un. Te ni cacahān i:

Tú ni ññ jeē cujéñnu nájñūhun quitī yáha, te tú ni ññ cundeyí cuajnáhan jíñ tī, áchí i jíñáhan i.

⁵ Te tu ní jési ya jeē cahān tī jeē quitī téyí cúu tī, jíñ jéē cahán ndevāha ti siquī yā. Te ni nihñ jñiñu ti jeē ndácu ti jñiñu uū xico uū yoō. ⁶ Te ni quejéé tī ni cahān ndevāha ti siquī Yaā Dios, jíñ siquī síhví yá, jíñ siquī nuū ndeé yá, jíñ siquī tāca jéé iyó andiví. ⁷ Te tu ní jési ya jeē cuajnáhan ti jíñ ñáyuu maá Yaā Dios, te cundeyí tī jíñ i. Te suni ni nihñ jñiñu ti jeē ndácu ti jñiñu nuū ñáyuu tāca yúcūn, tācá ñuu, tācá yuhu, tācá nación. ⁸ Te ñayuu ñí cáhnu ñayīvī jéé tu yósó síhví i nuū tútu, ni cachiñúhún i quitī xéén un. Te Yaā cúu Londe jeē ní cajehni i, máá yá névāha tutu un jéé yosó síhví ñáyuu cotecu ñí cáni, te je yósó síhví i nde quiví ni jécōo ñayīví.

⁹ Ñayuu iyó sóho na chúsóhó váha i jñūhun cahān rī yāhá. ¹⁰ Tāca ñáyuu jeē sáha jeē quiví jnáhan vecāa, suni vecāa cone máá i. Te tāca ñáyuu jeē jéñi jnáhan jíñ espada, suni jíñ espada cuu maá i. Núu súcuan te ñayuu maá Yaā Dios chi jíni ñúhún cuandeyí ni i jíñ jnúndóho te ma jécuiñī i candíje i jñūhun cúndáhú ni yā i.

¹¹ Yūcuán na te ni jito ri ñnga quitī xéén jeē ní cane

chiji ñuhun. Te íyó úū ndiqui ti jeē cáa nájñuhun ndiqui lánchi. Te nájñuhun tachī coō cáhnu, súcuan tachī cahán tī. ¹² Te nájñuhun ndácu quitī xéén xihna ñúhún jniñu, suni súcuan ndácu quitī uū ún jniñu, íin ti nuū quitī xihna ñúhún. Te quitī uū sáha ti jeē chiñúhún táca ñáyuu ní cáhnu ñayívi nuū quitī xihna ñúhún, quitī ní tújī jeē jé yajni cuu tī te ni nduváha ti. ¹³ Te quitī uū suni sáha táca jniñu jéñu jeē nahán náā ni yō jíto yó. Chi ni scúun ti ñuhún ichi ándivi ní quiji ini ñayívi, ní cajito ñayuu. ¹⁴ Te ni stahú tí ñayuu ñayívi jíin táca jniñu jéñu jeē ni níhín tī poder jeē sáha ti, jíto jínuū quitī xihna ñúhún. Te ni ndacu ti jniñu jeē na sáha ñayuu imagen quitī xihna ñúhún, quitī ní tújī jíin espada, jeē jé yajni cuu tī te ni nduváha ti. ¹⁵ Te quitī uū ni níhín tī poder jeē chutáchí tí xijnī imagen quitī xihna ñúhún, náváha cuu cahán, te cahni táca ñáyuu jeē tu cájetáhú i chiñúhún i máá. ¹⁶ Te táca ñáyuu kujéñu jíin ñáyuu tu cújéñu, táca ñáyuu cucá jíin ñáyuu ndahú, táca ñáyuu sájniñu cuenta maá jíin mozo jeē ní cajeen ñayuu, ni sáha ti jeē ni jécondee ñn jnunī ndaváha i chí jnéē i. ¹⁷ Te ni ñn ñayuu ma cúu cuaan i xícó i te núu tu ndíso i jnunī jeē cúu síhvi tí chí jnúni número jeē cúu síhvi tí. ¹⁸ Jñuhun ndíchí cúu jeē cahán rī yāhá: Táca ñáyuu jécūhun vāha ni cuu tava i cuenta número quitī xéén un, chi número un cúu síhvi ñn tēe. Te número un cúu iñū ciento unī xico iñū.

Yaa jeē cájita 144,000 ñayuu

14

¹ Yūcuán na te ni ndacoto ri, te ni jito ri jeē íin máá Yāā cúu Londe xinī yucu Sión. Te cáhín ciento

uū xico cuūn mil ñayuu jíin yá. Te jneē i ndéé síhví máá yá jíin síhví Tátá yā Yaā Dios. ² Te ni jini sōho ri jeē níhin ndasí ichi ándiví, nájnūhun jeē jíca cuehē yūte chí jeē cahán níhin taja. Te jeē níhin un sáha nájnūhun jeē cátee cuehē ñayuu yaa jeē naní arpa. ³ Te cáhīn i ichi núú mesa nuū ndácu Yaā Dios jniñu, jíin núú ndicúun jeē técu, jíin núú ndihóco cuūn tēe jéhnú cándiso jniñu. Te ni cajita i ñin yaa jeé. Te ni ñin ñayuu tu cúu cutūhva i yaa ún, chí máni máá ciento uū xico cuūn mil ñayuu jeē ní jnama ya i ini ñayiví. ⁴ Te tāca tēe yáha cácuu jeē tu ní cásaha cuēchi jíin ñahan cásaha néé, chí tēe ndoo ánuá cácuu de. Te cándiquīn de Londe ndé-ni cúu-ni nuū cuahán yā. Chí ní jnama ya de ini ñayiví, te máá de cácuu tēe jeē xíhna gā ní cacandíje nuū Yaā Dios jíin núú Yaā cúu Londe. ⁵ Te tú cuiti na jnūhun stáhú cácahán de, chí tēe ndoo ánuá cácuu de, cáhīn de nuū mesa Yaā Dios.

Jnūhun jeē ní cacahán ndinúni ndajéhé yā

⁶ Yūcuán na te ni jito ri inga ndajéhé yā jeē ndáva cuahán sava andiví. Te ndiso ya jnūhun jeē jnama Yaā Dios ñayuu cotecu i ní cáni. Te ni nacani ya jnūhun un núú tāca ñáyuu ní cáhnu ñayiví, nuū ñáyuu tācá nación, tāca yúcūn, tācá yuhu, tācá ñuu. ⁷ Te ni cahán jee ya:

Conso iyo ró núú Yaā Dios, te na cáhán rō jeē yóhyo cújéhnú ya, chí je ni quee quiví jeē sándaā yā síquī rō ndese ni casáha ró. Te na chíñúhún ró yā, chí máá yá ní sáha andiví jíin ñáyiví jíin mar jíin tāca núú cáne ndute, áchí ndajéhé yā.

⁸ Yūcuán na te ndíquín inga ndajéhé yā vēji, te ni cahán yā:

Je ni naa iĩ ñuu teyí Babilonia. Chi ni sáha jeē ñáyuu tācá nación casíquí ndéē i Yaā Dios jeē ní castóo i ya te cándiquĩn i ídolo jíin táca jniñu néé, áchí ndajéhé uũ.

⁹ Yūcuán na te ndíquín inga ndajéhé unī vēji, te ni cahān jee ya:

Xeēn coo síquĩ ñáyuu cáchiñúhún quitĩ xéén jíin imagen tĩ, te jéhe i jnūhun condee jnunī tĩ jneē i chí ndaha i. ¹⁰ Chi nihĩn i castigo xeēn síquĩ cuéchi ni casáha i, chí quitĩ ni Yaā Dios nuū i, te tuá cone cáhnu ni yā. Te ndoho i nuū cayú ñuhūn jíin azufre, coto tācá ndajéhé Yaā Dios jíin Yaā cúu Londe. ¹¹ Te ñuhmā nuū cándoho i cánda nĩ cáni cuiĩ. Te nduú ñuú tu ndétátú ñáyuu cándoho ún jeē ní cachiñúhún quitĩ xéén jíin imagen tĩ, jíin jéé ni jécondee jnunī síhvĩ tĩ. ¹² Jeē yúcuan ñáyuu maá Yaā Dios jeē casquícu i jniñu ndácu ya te cácandíje vāha i Jesús, cánuú jéé cuándeýí ni i. Achí ndajéhé unī.

¹³ Yūcuán na te ni jini sōho ri ñn jnūhun ichi ándiví jéé ni cáhān jíin rí:

Teé ró jnúhun jeē cahān rī jíin ró yāhá: Nacā jeē ndetū tāca ñáyuu cácandíje Jitoho yō jeē cájihĩ vijna jíin ndé nĩ cuáhān yō. Jendaá chí ndetátú i jeē ní casáha i jniñu vāha, te jniñu i un má nāa chí sáha jeē quendōo vāha i nĩ cáni, áchí Espíritu.

Jeē ní nastútú yá ñáyuu ñayĩvĩ

¹⁴ Yūcuán na te ni ndacoto ri, te ni jito ri ñn vicō cuijín. Te nuū vicó un néne Yaā ní nduu tēe. Te xinĩ yā ñúhun corona oro, te ndáhá yá ñn hoz xeēn. ¹⁵ Te ni quenda inga ndajéhé yā ini templo, te ni cana jee, te cáhān jíin Yaā néne nuū vicó un:

Cahnde ni jíin hoz ní, te nastútú ní ñayuu ñayĩví. Chi je ni quee quivĩ jeē nastútú ní i nájnūhun táhndé trigo jeē jé ni cuaan, áchí.

¹⁶ Yūcuán na te Yaā néne nuū vicó ni nastútú yá ñayuu váha ini ñayĩví, nájnūhun táhndé trigo jíin hoz.

¹⁷ Yūcuán na te ni quenda inga ndajéhé yā ini templo jeē iyó andiví, te suni ndáhá yá ñn hoz xeēn.

¹⁸ Te nde nuū altar ni quenda tucu inga ndajéhé, te ndíso jníñu ya síquĩ ñuhūn altar. Te ni cana jee ya, te cáhán yā jíin ndajéhé jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayĩví, nájnūhun jeē cájehnde i chutū ndehē uva jeē jé ni jichi, áchí.

¹⁹ Te ndajéhé un ní jehnde yā jíin hoz yā, te ni nastútú yá ñayuu casáha néé ini ñayĩví, nájnūhun ndútútú ndehē uva. Te ni jnaa ya i nuū nihín i castigo xeēn Yaā Dios, nájnūhun jnáa i ndehē uva nuū taxín. ²⁰ Te ni jēhe ya castigo i yatañú, te ni jica niñĩ i nájnūhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhé jíin ndihúxá jnūndóho jeē sándihí

15

¹ Te ni jito ri inga jniñu jéhnu ichi andiví jéé náā ni yō jito yó. Chi cáhīn uxā ndajéhé yā jeē cuāha ndihúxá jnūndóho sandihí na. Te jeē jínu ndihúxá jnūndóho yáha, te jīnu jeē cuáha Yaā Dios castigo xeēn síquĩ cuéchi.

² Te suni ni jito ri ñn jeē cáa nájnūhun mar, te cáa nájnūhun vidrio jeē ndíndēe nájnūhun ñuhūn. Te yumar un cáhīn ñayuu ni cacundeyí síquĩ quiti

xéén jíín imagen tí, jíín jéē tu ní cáquihin i jnūnī número jeē cúu síhví tí. Te cándāhá i yaa jeē naní arpa jeē ni jéhe Yaā Dios nuū i. ³ Te cájita i yaa jeē ní tava Moisés, tēe cúu mozo Yaā Dios, jíín yaa maá Yaā cúu Londe. Te súcuan cáhán yaa ún:

Yōhyo náā ni na cájito ná ndihí jniñu jéhnū teyí jéē sáha ní,

Tátā Yaā Dios, chí jnī ní ndihí poder.

Te máni jniñu ndaā jniñu váha sáha ní, jeē cúu ní Rey nuū tēcá nación.

⁴ Tú ni ñn i iyó jéē ma cónso iyo i nuū ní, Tátā Yaā Dios.

Te ndihí i cahān nahín i jeē yóhyo cújéhnū ní.

Chí máñúhún ni máá ní cúu Yaā ndoo Yaā íi.

Te quijicoo ñayuu tēcá nación, chíñúhún i níhín, chí je ni cajini i jeē ndaā vāha sáha ní táca jniñu.

Achí i cájita i.

⁵ Yūcuán na te ni ndacoto ri, te ni jito ri jeē ini andiví núne cuarto íi ini templo nuū íne tabla yuū jeē yosó ley yā. ⁶ Te ini templo un ní quendacoo ndihúxá ndajéhé jeē cándiso jniñu síquī ndihúxá jnūndóho. Te cáñuhun ya sahma fino iyó ndoo te xíñú. Te núhní cinturón oro jicā yā. ⁷ Te ñn jnáhan ndicúún jeē técu ni jéhe ñn ñn cohō oro nuū ndihúxá ndajéhé un. Te ini cohō un ñúhun chitú castigo xeēn jeē ní jéhe Yaā Dios, Yaā técu ní cáni.

⁸ Te ni chitú ndí ñuhmā ini templo, te suu ni steén jeē yóhyo cújéhnū Yaā Dios jíín poder jnī ya. Te ni ñn tu ní cúu quívi ini templo, chí nde na ndihí ndihúxá jnūndóho jeē cuáha ndihúxá ndajéhé yā.

Síquī ndihúxá cohō jeē ñúhun castigo

16

¹ Yūcuán na te ini templo ni jini sōho ri ñn jnūhun cáhán jee jíin ndihúxá ndajéhé yā:

Cuangoo te cati ró síquī ñayīví ndihúxá cohō jeē ñúhun castigo xeēn jeē ni jéhe Yaā Dios, achí.

² Te cuahān ndajéhé ñn, te ni jeti ya cohō yā síquī ñayīví. Te tāca ñáyuu jeē ndeé jnunī quiti xéén un jíin jéé cáchiñúhún imagen tī, ni canecoo ndihyi xeēn jeē jetú ndasí.

³ Te ndajéhé uū ni jeti ya cohō yā nuū mar, te ndute mar ni nduu nájnūhun niñī ndíyi. Te ni cajihī tācá quiti jeē ñúhun ini mar.

⁴ Te ndajéhé unī ni jeti ya cohō yā ini tāca yúte jíin tāca núū cáne ndute, te ni nduu niñī. ⁵ Te ni jini ri jeē cahán ndajéhé jeē ndíso jniñu síquī ndúte:

Tátā Yaā Dios, maá ní cúu Yaā ndoo Yaā iī, Yaā iyó vijna, te ni iyo ní ní cáni. Te ndaā sáha ní jeē súcuan ni ndonda ní síquī cuéchi i. ⁶ Chi ni casáha i jeē ní jeti niñī ñayuu ndoo ní jíin ñáyuu ní canacani jnūhun ní. Te vijna chi ni sáha ní jéé cájiji i niñī, chi ñayuu casáha jniñu néé cácuu i, jeē cánuu ndoho i súcuan.

⁷ Te ni jini sōho ri jeē cahán inga nde nuū altar:

Tátā Yaā Dios, máá ní cúu jeē jniñi poder. Te jniñu váha jniñu ndaā ni sáha ní jéé ní ndonda ní síquī cuéchi i. Achí.

⁸ Te ndajéhé cuūn ni jeti ya cohō yā síquī níāndii, te ni jéhe Yaā Dios jnūhun jeē ndujíhni ndasí níāndii návāha cayū ñayuu. ⁹ Te xeēn ndasí ní cayū tāca ñáyuu. Te vésú súcuan te tu ní cánacani ni i stóo i cuéchi i, ni tu ní cácahān i jeē cujéhnu Yaā Dios. Chi sa suhva ni cacahān ndevāha i síquī yā jeē ni jéhe ya tācá castigo yáha nuū i.

10 Te ndajéhé uhūn ni jeti ya cohō yā nuū mesa nuū ndácu quiṭi xéén jniñu. Te ni cunee nií cáhnu nuū ndácu ti jniñu. Te cánacayihī ñáyuu yuhu i jeē cájetū ndasí i. 11 Te vēsú súcuan te tu ní cánacani ni i stóo i jniñu néé cásáha i. Chi sa ni cacahān ndevāha i siquī Yaā Dios andiví siquī jeē cájetū ndasí i jíin ndíhyi xeēn cándoho i.

12 Te ndajéhé iñū ni jeti ya cohō yā siquī yúte cáhnu jeē naní Eufrates. Te ni ichi ndihī ndute yúte ún, návāha nune ñn ichi jeē quíjicoo táca rey ichi núū cáne niāndii.

13 Te ni jito ri jeē ini yuhu coō cáhnu jíin ini yuhu quiṭi xéén jíin ini yuhu máá téé nácani jnūhun stáhú ní canecoo unī tachī jeē cáa nájñūhun sáhvá. 14 Te tachī ún chi ndajéhé jexeén cácuu, te cásáha jniñu jéhnu jeē náā ni ñayuu cájito i. Te ni quendacoo tachī un jeē nastútú táca rey nií cáhnu ñayīvi, jéé cuajnáhan de siquī Yaā Dios quiṭi jeē ndíji ya. Te máá yá cúu jeē jñí ndihī poder. 15 Cuni sōho jíjñáhan ró, chi sanaa ni rō te ndíji ri, nájñūhun jeē ñn sanaa-ni te quiṭi ñacuīhná. Te nacā jeē ndetū ñayuu jeē ndito ni i, te ndító yúcún i sahma i, návāha ma cáca vichí lí i, cúu jeē tú na cuēchi coo siquī i jeē cucanu i nuū táca ñáyuu, achí yá. 16 Te ni canastútú táchī un táca rey, ni candutútú ñn lugar jeē yuhu hebreo naní Armagedón.

17 Te ndajéhé uxā ni jeti ya cohō yā nuū tachí. Te ini templo andiví jíin núū mesa nuū ndácu ya jniñu, ni cane ñn jnūhun jeē ni cáhān jeē:

Je ni jíinu, achí.

18 Yūcuán na te ni ndindéé taja, te níñin, te cáhán taja, te ni jnāa ndasí. Chi nde nií cáni jeē iyó ñáyuu ñayīvi, tu ní jnáa níñin ndasí nájñūhun jeē ni jnáa ni

jito ri. ¹⁹ Te máá ñuu cujéhnú Jerusalén, ni cusín ni nduu unī parte, te nń cáhnu ñayīví ni naa tācá ñuu. Te ñuu teyí Babilonia, chi ni sáha nahín yá jeē ní ndutahū i castigo xeēn, chi ni quitī ndasí ni yá siquī cuéchi i. ²⁰ Te ni naa tāca isla, te suni yucu tuá gā. ²¹ Te ichi ándiví ní cuun ñíñí náhnu siquī ñayuu, jeē véyi nde uū xico kilo. Te ni cacahān ndevāha ñayuu siquī Yaā Dios jeē ní cuun ndasí ñíñí, chi ñn jnūndóho xeēn ni cuu.

Jeē ndonda ya siquī ñuu neé Babilonia

17

¹ Yūcuán na te ni quiiji ñn jnáhan ndihúxá ndajéhé jeē ní candāhá ndihúxá cohō ún, te ni cahān yā jíin rí:

Nehen, te na stéén rī nuū rō ndese coo castigo siquī maá ñahan jnéni jeē cúu ñuu cujéhnú íne nuū iyó cuéhē ndute. ² Chi tāca rey ñayīví nájñūhun ni casíquí ndéē de jíin ñahan ún, cúu jeē ní castóo de Yaā Dios te cándiquīn de jñūhun néé ní steén ña. Te ni sáha ña jeē ñáyuu nń cáhnu ñayīví, nájñūhun nájñi i te casíquí ndéē i Yaā Dios cúu jeē ní castóo i ya te cásáha ndasí i cuéchi. Achí ndajéhé yā.

³ Te ni sáha ga Espíritu Santo jeē ní jito ndijin rī, te ndajéhé yā un cuáhān yā jíin rí nde nuū ñūhun téhé. Te ni jito ri ñn ñahan, yósó ña ñn quitī xéén cacuéhé. Te nń cáhnu ti ndeé jñūhun néé jéē quití ni Yaā Dios sáha. Te iyó úxā xinī tī jíin úxī ndiqui ti. ⁴ Te ñahan un ñūhun ña sahma ndihí jíin sahma cuehé, te suni ñūhun ña siquī oro jíin yúu luu jíin perla jeē ndeé yahu. Te ndáhá ña ñn cohō oro jeē ñūhun chitú jíin jniñu néé ndasí jíin jniñu jnehén jéē jíca jnéni ña.

⁵ Te jneē ña ndéé ñn sġhvġ jġē cúu ñn jnūhun sāhġ, te suhva cáhán: Yāha cúu ñuu teyġ Babilonia, jeē cúu nájnūhun náná tāca jġē cájica jnéni jġín jġē casáha néé ndasġ ini ñayġvġ, áchġ. ⁶ Yūcuán na te ni jini rġ jeē ñahan un náġġni ña jeē nájnūhun ni jihġ ña niñġ ñayuu maá Yaā Dios jġín níñġ ñayuu ni cajihġ síquġ jeē ní canacani ndaā i jnūhun Jesús. Te nahán ní naa ni rġ ni jito ri ña. ⁷ Yūcuán na te ni cahān ndajéhé un jġín rġ:

¿Naun náā ni rō jġto ró? Na cástūhun rġ nuū rō ndese cúni cahān jnūhun sāhi síquġ ñahan un jġín quġti xéén yosó ña, jeē iyó úxā xinġ tġ jġín úxġ ndiquġ tġ. ⁸ Quġti xéén jeē ní jito ró, chí ni cotecu tġ, te vijna chí tuá tġ. Te ndenda tucu tġ ini tūhnchi cúnú, te yūcuán na te quġhġn tġ nuū jnahnú ndetū tġ. Te ñayuu cáyūcu ní cáhnu ñayġvġ, naa ni i coto i nuū quġti un jġē ní cotecu tġ te ni jihġ tġ, te natecu tucu tġ. Te cácuu i ñayuu jeē tu yosó sġhvġ i nuū tútu jeē yosó sġhvġ ñayuu cotecu ní cáni jeē ni jġcosō sġhvġ i nde quġvġ ni jġcōo ñayġvġ.

⁹ Tāca ñayuu jġcūhun vāha ni, cuu tava i cuenta ndese cúu: Ndihúxá xinġ tġ cácuu nájnūhun uxā yucu nuū néne ñahan ún. ¹⁰ Te ndihúxá xinġ tġ suni cácuu nájnūhun uxā rey. Te uhūn rey un je ni naa jeē ndácu de jniñu, te ñn de ndácu jniñu vijna, te ġnga de chí ná tu quġji de. Te núu na quġji de te jecu-ni tiempo coo de. ¹¹ Te quġti xéén jeē ní cotecu te tuá iyó tġ vijna, máá tġ cuu rey unā. Te ñn jnáhan ndihúxá rey un cúu tġ. Te suni quġhġn tġ nuū jnahnú ndetū tġ.

¹² Te ndihúxġ ndiquġ jeē ní jito ró cúu nájnūhun uxġ rey, te ná tu ndacu de jniñu jġjnáhan de. Te máá de jġín quġti xéén un, chí nihġn jniñu de cuu de rey

jecu-ni tiempo. ¹³ Te ndihúxí rey un chi squíjnáhan de jnūhun, te nacūaha de poder de jíin jniñu ndíso de nuū quití xéén un návāha ndacu ti jniñu. ¹⁴ Te cuajnáhan de jíin Yaā cúu Londe. Te Yaā cúu Londe quende yā poder de jíjnáhan de. Chi máá yá cúu Jítoho nuū tāca jítoho, te máá yá cúu Rey nuū tāca rey. Te ñayuu cáhīin jíin yá, chi ni nacāji Yaā Dios i te ni cana ya i, te cásquícu vāha i. Achí ndajéhé un.

¹⁵ Te ni cahān gā yā:

Cuehē ndute jeē ní jito ró núū néne ñahan jíca jnéni, suu cúu ñayuu cuehē tācá ñuu, tācá yuhu, tācá nación. ¹⁶ Te ndihúxí ndiqui jeē ní jito ró jéē névāha quití xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichí líi ña. Te caji de cūñu ña te cahmu de ña nuū ñuhún. ¹⁷ Chi Yaā Dios scánda ya ini de jeē na sáha de jniñu cúní yā. Te squíjnáhan de jnūhun jeē nacūaha de jniñu ndíso de nuū quití xéén un, ndacu ti jniñu nde na squícu tāca jnúhun ni cahān Yaā Dios. ¹⁸ Te ñahan jeē ní jito ró cúu máá ñuu teyí jéē cujéhnū nuū tāca rey ñayíví. Achí ndajéhé un.

Siquí jeē naa ñuu Babilonia

18

¹ Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéhnū ndasí yá. Te jeē ndíndēe yá te ni ndíndēe núū ñayíví. ² Te ni cana jee ya:

Je ni naa iī ñuu teyí Babilonia. Te ni nduu vehe tāca táchī, nuū ñúhun ndinuū tachī neé, jíin táca téji, quití quíni jeē tu nújnahan ni yō. ³ Chi ñuu un cúu nájnūhun ñn ñahan ndevāha, te ni sáha ña jeē ñáyuu

tācá nación, nájñūhun nájīni i te cásiquí ndéē i Yaā Dios, cúu jeē ní castóo i ya te cásáha ndasí i cuēchi. Te tāca rey ñayīvi, nájñūhun ni casíquí ndéē de jíin ñahan ún jeē ní cajetáhú de jñūhun néé ní steén ña. Te ñayuu ní ñáyīvi jéē cájeen caxícó, ní cacucúca i jíin cuéhē jeneé jeē ní nevāha ña.

⁴ Yūcuán na te ni jini sōho ri inga jñūhun jeē ni cáhān ichi ándiví:

Máa ró jeē cácuu ró ñáyuu maá rí, quendacoo ró ini ñuu jíñā, návāha ma quívi nduu rō jíin táca cuéchi jeē sáha ña, te návāha ma ndóho ró jñúndóho xeēn jeē ndoho ña. ⁵ Chi ni cayā cuehē ndasí cuéchi ña, nájñūhun ñn montón cáhnu ndasí jéē ní cusúcún ndé andiví. Te vijna te nduxeēn Yaā Dios síquī cuéchi ña. ⁶ Stóho ró ña nájñūhun ni sáha ña jeē ní ndoho sava ga ñayuu. Te nachunaa rō nuū ña doble jñúndóho jeē ni jéhe ña nuū inga ñayuu. Te sáha ró jeē nandicó cóo doble síquī ña vēsú jeē ni sáha ña síquī inga ñayuu. ⁷ Te yōhyo ni satéyí ña máa ña, te cúca ndasí ní cotecu ña. Te suni jíin cúhva yúcuan nacuaña ró jéē ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuíti jñúndóho ndoho ri, achí ña. ⁸ Jeē yúcuan cúu jeē ñn quívi-ni te quíji cuehē jñúndóho síquī ña. Chi cuu ndíyí, te cucuíhyá ndasí ni ña, te coo jnamā, te cayū ña nuū ñuhún. Chi yōhyo íyó poder maá Jítho yō Yaā Dios, Yaā ní ndonda síquī cuéchi ña, achí.

⁹ Te tāca rey ñayīvi jéē ní casíquí ndéē de jíin ña te ni cotecu cúca ndasí de jíin ña, ndahyū de te ndahyū cohó de coto de jeē cánda ñuhmā cayú ña. ¹⁰ Te cuiñi jíca de chi yūhú de coto de jeē súcuan ndoho ña castigo. Te cahān de jíjnáhan de:

Nacā jeē xeēn ndóho ró, ñuu cujéhnu Babilonia, chi yá-ni ñuu teyí ní cuu ró núú. Te vijna chi ñn núnúu-ni te ni quee castigo jeē náā rō, achi de jíjnáhan de.

¹¹ Te tāca téē ñayīvī jeē cájeen caxīcō ñuu ún, ndahyū de te ndahyū cohó de jehē. Chi tuá ndé ñn cuaan ndajníñu caxīcō de. ¹² Te ndajníñu caxīcō de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jéē cuehé. Te suni tācá yujnu jeē asñ jéen xicō, jíin tāca ndajníñu luu jeē ni sáha jíin marfil jíin yujnu lúu jeē ndeé yahu jíin cáa cuaán jíin cáa hierro jíin yúu cuijín luu. ¹³ Te suni caxīcō de canela jíin tāca jíhyo asñ jíin súde cutú jíin súde uvuā jíin tāca perfume jíin vino jíin aceite jíin harina fina jíin trigo. Te suni caxīcō de quití ndiso jíin lanchi jíin caballo jíin carreta, te nde ñayuu caxīcō de jeē sájniñu sáa-ni i. ¹⁴ Te cahān de jíin ñuu ún:

Ni cujiyo ndihí ndajníñu cúcá jeē ní nujnahan ndasí ni rō. Te tāca jéē lúu jeē váha jeē ní cotecu cucá ró, chi ni naa ndihí, te ma nánihñn cuiti gā rō, achi de jíjnáhan de.

¹⁵ Te tāca téē ni cajeen ni caxīcō ní cacucúca jéē siquí ndajníñu ñuu ún, chi cuiñi jíca de jeē yūhú de coto de castigo coo ñuu ún. Te ndahyū de te ndahyū cohó de. ¹⁶ Te cahān de jíjnáhan de:

Nacā jeē xeēn ndóho ñuu teyí yáha. Chi ni cuu nájnūhun ñn ñahan jeē ni ñúhun sahma fino, sahma ndihí jíin jéē cuehé. Te ni ñuhun ña siquí oro jíin yúu luu jíin perla jeē ndeé yahu. ¹⁷ Te vijna te ñn núnúu-ni te ni naa ndihí tācá ndajníñu váha ún, achi de jíjnáhan de.

Te cuiñi jícá táca tée cáscáca barco, jiín ñáyuu cuángoo nuū barco, jiín tée cásájniñu ini barco, jiín táca gá tée cásájniñu nuū mar. ¹⁸ Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jéē cujéhnu nájnūhun ni íyo ñuu yáha? achi de.

¹⁹ Te cosō de ticachā ñuhun xinī de jeē cácuquíyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíjn ndajniñu cúca jeē ni íyo ñuu un ní cacucúca táca ñáyuu cánevāha barco cájica nuū mar. Te vijna te ñn núnúu-ni te ni naa ndíhi-ni, achi de.

²⁰ Te na cúsiñi ni tāca róhó jéē cáyūcú andiví, siquī jeē ní naa ñuu ún. Te na cúsiñi ni rohó, táca tée apóstol, jiín tée cánacani jnūhun Yaā Dios, jiín ñáyuu maá Yaā Dios. Chi ni sáha néé ñuu un síquī rō jíjnáhan ró, te jeē yúcuan ní ndonda Yaā Dios siquī, achi de.

²¹ Yūcuán na te ñn ndajéhé ndíso poder, ni quihin ya ñn yuū cáhnu nájnūhun ñn yōso cáhnu, te ni scáne ya ini mar. Te ni cahān yā:

Nájnūhun ni naa yōso yáha, suni súcuan naa Babilonia, ñuu cujéhnu téyí. Te ma núcoo cuiñi gā jeē cóto yó núu. ²² Te ni cahān yā jiín ñuu ún: Ini calle rō ma cúni sōho cuiñi gā ñayuu jeē scáta i yaa arpa jiín flauta jiín trompeta. Te suni ma cóo cuiñi gā ñayuu casáha tācá ndajniñu. Te suni ma cúni sōho ga i jeē ñhiñi tācá molino rō. ²³ Te ni ñn lámpara ma sáha ga jeē cundijin nuū rō. Te ni ma cúni sōho ga i vico jeē cácusñi ni ñahan tée nándāha mēhñu ró. Te ñayuu ní cajeen ni caxícó nuū rō, ni cacujéhnu

ndasí i ini ñayĩví. Te ni stahú ró ñayuu tǎcǎ nación jín jniñu tasí jín jniñu mágica. Achí ndajéhé un.

²⁴ Te ñuu un ní nihĩn castigo xeēn, chi síquĩ ñuu un ndéé cuēchi jeē ní jeti niñĩ tǎca téé ní canacani jnūhun Yaā Dios, jín tǎca ñáyuu maá yá, jín tǎca gá ñayuu ní cajehni i ní cáhnu ñayĩví.

19

¹ Te ná ni cuu tǎca jéé yáha, te ni jini sōho ri jeē cahán jee cuehē ndasí ñáyuu ini andiví:

Yōhyo cújéhnu Yaā Dios. Chi Yaā Dios maá yó cúu jeē ní jnama yóhó.

Te máá yá cújéhnu ndasí, te máá yá jnĩ ndihĩ poder.

² Te ndaā te vāha sándaā yā tǎcǎ jniñu, chi ni ndonda ya síquĩ cuéchi ñuu neé cújéhnu ún. Chi ni stívĩ un ñáyuu ní cáhnu ñayĩví jín jnūhun cásiquĩ ndéé Yaā Dios.

Te ni sáha ya jeē ní ndutahū ñuu un síquĩ jeē ní jehni tǎca mozo yā.

Achí i jínáhan i.

³ Te ni cacahān tucu i:

Yōhyo cújéhnu ya. Chi ní cáni canda ñuhmā ñuu un jéé cayú, achí.

⁴ Te ndihócu cuñ tēe jéhnu cándiso jniñu, jín ndicúún jeē técu, ni cajecuiñĩ yití de, te ni cachiñúhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cóo. Yōhyo cújéhnu ya.

⁵ Te nde nuū mesa nuū ndácu ya jniñu ni cahān iin jnūhun:

Róhó jéé cájegniñu nuū Yaā Dios,
jín róhó jéé cándiso iyo nuū yā,
jeé cácujuhnu jín jéé tu cácujuhnu,

na cáhán rō jeē yóhoyo vāha Yaā cúu ya.
Achí.

Vico jeē nándāha Yaā cúu Londe

⁶ Te ni jini sōho ri jeē cácahān ñayuu cuehē ndasí,
te níhin nájnūhun níhin cuehē yūte, te nájnūhun jeē
cahán níhin taja. Te ni cacahān:

Yóhoyo cújéhnū ya. Chi Jitoho yō Yaā Dios, Yaā jnū
ndíhi poder,

vijna te ndácu níhin ya jniñu.

⁷ Te na cúsiñ ni yō, te siñ ndasí na cóo ni yō,
te na cáhán yō jeē yóhoyo cújéhnū ya.

Chi ni quee quiví jeē nándāha máa Yaā cúu Londe.
Te je íyó túhva ñahan nandāha jíin yá, te suu cúu
ñayuu máa Yaā Dios.

⁸ Te ni nihīn ña jnūhun cuhun ña sahma fino jeē
ndóo ndasí te xíñú.

Achí i jíjnáhan i. Te sahma fino un cúu tācá jniñu
ndaā jeē casáha ñayuu máa Yaā Dios.

⁹ Te ni cahān ndajéhé yā jíin rí:

Tee ró jnúhun yáha: Nacā jeē ndetū tāca ñayuu jeē
ní cana ya quingoo vico nándāha Yaā cúu Londe.

Te ni cahān gā ndajéhé un jíin rí:

Tāca jnúhun yáha cúu jnūhun ndaā ni cahān Yaā
Dios, achí yá.

¹⁰ Te ni jecuiñí yití rí nuū jehé ndajéhé un jēe
chiñúhún rí yā nuú. Te ni cahān yā jíin rí:

Ma sáha ró súcuan. Chi ruhū suni mozo Yaā Dios
cúu ri, nájnūhun máa ró jíin tāca hermano rō jeē
cácañíje vāha jnūhun Jesús. Sa suhva nuū máa Yaā
Dios chiñúhún ró. Achí yá.

Chi jnūhun siquí Jesús cúu jeē cácahān ndaā
ñayuu cánacani jnūhun Yaā Dios.

Yaā yosó síquī caballo cuijín

¹¹ Yūcuán na te ni jito ri jeē núne andiví. Te ni cane ñn caballo cuijín, te Yaā yosó síquī tī naní yá Yaā ndaā, Yaā squícu, chí squícu ya jeē ni jéjnūhun ya. Te ndaā sándaā yā jniñu te ndaā ndóna ya síquī tāca jéneé. ¹² Te tinū yá ndíndēe nájnūhun yáñuhūn. Te xinī yā ñūhun cuehē corona. Te yósó ñn síhví yá jeē maá-ni ya cúu jeē jiní. ¹³ Te ñūhun ya ñn sahma jeē ni ñúndaji nuū niñí, te naní yá Jnūhun Yaā Dios. ¹⁴ Te tācá ndajéhé yā jeē iyó andiví, cáyosō caballo cuijín, cándiquñ yatā yā. Te cáñuhun sahma fino cuijín iyó ndoo. ¹⁵ Te ini yuhu máá Yaā jeē yosó síquī caballo, quénda jeē cáa nájnūhun ñn espada xeēn. Te espada un cúu jnūhun ya jeē stóho ya ñayuu tācá nación. Te ñihin ndacu ya jniñu nuū i. Te sándaā yā síquī cuéchi i nájnūhun jeē jeñú síquī ndehē uva cájexín. Te cuāha ya castigo xeēn ndoho i jeē quití ni yā síquī cuéchi i. Chí máá yá jnñ ndihí poder. ¹⁶ Te sahma ya jíin síhin ya yosó jnūhun yáha: Rey nuū tāca rey jíin Jítoho nuū tāca jítoho, áchí.

¹⁷ Yūcuán na te ni jito ri ñn ndajéhé yā jeē ín nuū níāndii. Te ni cana jee ya xinī tācá quití ndáva nuū tachí:

Ndutútú ró quiijicoo ró cuxíni ró ñn vico cáhnu sáha Yaā Dios. ¹⁸ Te caji rō cūñu tāca rey jíin capitán jíin téé téyí, jíin cúñu tācá caballo jíin téé ni cayosō síquī tī. Te suni caji rō cūñu tāca gá ñayuu, cúu ñayuu casájniñu cuenta maá jíin mozo jeē ní cajeen ñayuu, cúu ñayuu cácujuhnu jíin ñáyuu tu cácujuhnu. Achí ndajéhé yā.

¹⁹ Yūcuán na te ni jito ri maá quití xéén jíin táca rey ñayiví jíin cuéhē soldado de. Te ni candutútú

de jeē cuajnáhan de jíin máá Yaā yosó caballo jíin táca ndajéhé yā. ²⁰ Te ni jnīi ya quīti xéén cuahān tī preso jíin tée ni nacani jnūhun stáhú jeē ni sáha tācá jnīñu jéhnú jeē ní jito jíinúū quīti xéén. Chi jíin jnīñu jéhnú un cúu jeē ni stáhú de tāca ñáyuu jeē ní cajēhe jnūhun condiso jnunī quīti xéén, jíin jéē ní cachiñúhún imagen tī. Te quīti xéén un jíin tée ni nacani jnūhun stáhú un, cátecu ndindúú te ni scáne ya nuū laguna ñuhūn jeē cayú jíin azufre. ²¹ Te jíin espada jeē cáne yuhu Yaā yosó caballo ni cajihī tācá soldado quīti xéén un. Te tācá quīti ndáva nuū tachí ni candutú chíji tī ni cayeji tī cūñu de jíinánhan de.

Siquī mil cuiyā

20

¹ Te ni jito ri jeē ní cuun ñin ndajéhé yā ichi ándiví. Te ndáhá yá ndacáa jeē núne tūhnchi cúnú ndasí. Te suni ndáhá yá ñin cadena cáhnu. ² Te ni jnīi ya maá cóo cáhnu jeē iyó ndé jenahán ndasí, te nání tí jexeén jíin Satanás. Te ni jihni yā jeē conuhnī mil cuiyā. ³ Te ni scáne ya ini tūhnchi cúnú ndasí. Te ni jesi vāha ya, te ni sácutú yá yuyáú, návāha ma stahú gá un ñáyuu tācá nación, chi nde na jíinu mil cuiyā. Te jeē yáha mil cuiyā ún, yūcuán na te cánuú jéē ndajī caca cuu jecu na tiempo.

⁴ Te ni jito ri tāca mesa nuū ndácu jnīñu, te yūcuan cáyūcu táca ñáyuu jeē ní canihīn jnīñu i sándaā i jnīñu. Te suni ni jito ri anuá tāca ñáyuu jeē ní cajehnde xinī i siquī jeē ní canacani i jnūhun Jesús jíin jnúhun Yaā Díos. Te tu ní cáchiñúhún i quīti xéén jíin imagen tī, ni tu ní cájēhe i jnūhun jeē

cóndee jnuni tī jneē i chí ndaha i. Te ni jito ri jeē ní natecu i te ni candacu i jniñu jín Cristo mil cuiyā. ⁵Yāha cúu ndíyī jeē nátecu xīhna gā. Te tāca gá ndíyī, tu ní cánatecu i, chí nde jeē jínu mil cuiyā. ⁶Te nacā jeē ndetū tāca ñáyuu ndoo ánuá jeē nátecu xīhna gā. Chí ma cúu cuiṭi i vuelta uū. Te cuu i sutū nuū Yaā Dios jín núu Cristo, te ndacu i jniñu jín yá mil cuiyā.

⁷Te jeē jínu mil cuiyā ún, te ndajī Satanás te quenda nuū yíndihyū. ⁸Te stáhú tucu ñayuu tācá nación nī cáhnu ñayīví. Te stáhú ñayuu ñuu Gog jín Magog. Te sāha jeē ndutútú tāca soldado ñuu un jéé cuajnáhan de. Te coo cuehē ndasí de nájñuhun ñīṭí yumar. ⁹Te cuiṭē núu de quingoo de nī cáhnu ñayīví. Te cuicó ndúū de ñuu nuū cáyūcu ñáyuu maá Yaā Dios, ñuu jeē maní yā jín. Te Yaā Dios chí scúun ya ñuhūn ichi ándiví, te cayū ndihī de. ¹⁰Te jexeén jeē ní stáhú tāca ñáyuu ún, chí scáne ya quihīn nuū laguna ñuhūn jeē cayú jín azufre. Te yūcuán chí xīhna gā ní scáne ya quiṭi xéén jín téé ní nacani jñuhun stáhú. Te yūcuán ndoho nduú ñuú nī cáni cuiṭi.

Jeē sándaā yā jniñu nuū mesa cuijín

¹¹Yūcuán na te ni jito ri ñn mesa cuijín cáhnu, te néne máá Yaā ndácu jniñu. Te ñayīví jín andiví ní ndoñúhún cuáhān jeē ní jito ya nuū, chí tuá ní cúu quendōo nuū yā. ¹²Te ni jito ri tāca ndíyī, jeē ní cujéhnu jín jéé tu ní cujéhnu, cáhīn nuū Yaā Dios. Te ni sāha ya jeē núne tāca libro, te suni ní nune inga libro jeē yosó síhvī ñáyuu cotecu nī cáni. Te ni sándaā yā siquī tāca ndíyī ún, núu ndese jniñu ní casáha i jín ndese yosó núu tāca libro un. ¹³Te tāca

ndíyí jeē ní cajihī nuū mar, ni nanecoo. Te suni ni nanecoo tāca ndíyí jeē ní cajihī i, jeē íne i máá lugar nuū cáyūcu ánuá ndíyí. Te ni sándaā yā síquī, núu ndese ni casáha ñn ñn i. ¹⁴ Yūcuán na te cuehyī jéhni ñayuu jíin lugar nuū cáyūcu ánuá ndíyí, ni snáā yā ni scáne ya cuangoo nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeē cúu i vuelta uū. ¹⁵ Te yūcuan ní scáne ya tāca ñáyuu ni casáha jniñu néé jéé tu yósó síhví i nuū libro jeē yosó síhví ñayuu cotecu ní cáni.

Andiví jéé jíin ñáyiví jéé

21

¹ Yūcuán na te ni jito ri andiví jéé jíin ñáyiví jéé. Chi andiví jíin ñáyiví xíhna ñuhún ni naa. Te suni tuá mar. ² Te ruhū Juan, ni jito ri ñuu iī jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájñuhun ñn ñahan jeē ni sátūhva ña ni cucutú ña jeē nándāha ña jíin yí ña. ³ Te ni jini sōho ri ñn jñuhun jeē ni cáhān jee ichi ándiví:

Condēhé, chi vijna te ndéé Yaā Dios mēhñu ñáyuu. Te condee yā jíin i jíināhan i, te cuu i ñayuu maá yá. Te maá yá condee yā jíin i jeē cúu ya Yaā Dios i. ⁴ Te nacuaa yā ndute tñúú i jíināhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yāha tāca jñúndóho jeē ni íyo, áchí.

⁵ Yūcuán na te ni cahān maá Yaā néne nuū mesa: Condēhé, chi nasáha jeé rí tāca jéé iyó, áchí yá.

Te suni ni cahān yā:

Tee ró jñuhun yáha. Chi tāca jñuhun yáha cúu jñuhun jeē jiní ndije ró jéé ndaā cúu.

⁶ Te ni cahān gā yā:

Je ni jīnu. Máá rí cúu nájnūhun letra A xīhna ñúhún jín letra Z jeē sándihí na, chí máá rí ni squeejéé ndihí te máá rí sínu. Te tāca ñáyuu cájichī, súcuan-ni cuāha ri coho i ndute cáne jeē cótecu i ní cáni. ⁷ Tāca ñáyuu jeē cúndeyí síquī jéneé, nihīn i ndihí jeē yáha cuu tahū i. Te cuu ri Yaā Dios i, te cuu i sēhe ri. ⁸ Te tāca ñáyuu jeē cáyūhú ndoho síquī jnūhun ri, jín ñáyuu tu cácandíje, jín ñáyuu casáha jniñu néé, jín ñáyuu cájehni ndīyi, jín ñáyuu cájica jnéni, jín ñáyuu casáha tási, jín ñáyuu cáchiñúhún ídolo, jín táca ñáyuu castáhú, ñáyuu ún chí quivícoo i laguna ñuhūn jeē cayú jín azufre. Te yūcuan cúu jeē cúu i vuelta uū.

Jerusalén jeé

⁹ Yūcuán na te ni quiji ñn jnáhan ndihúxá ndajéhé jeē ní candāhá ndihúxá cohō jeē ni ñúhun chitú ndihúxá jnūndóho sandihí. Te ni cahān yā jín rí:

Nehen, te na stéén rī nuū rō ñahan jeē nándāha ña cuu ña ñasihí Yaā cúu Londe, áchí yá.

¹⁰ Te ni sáha ga Espíritu Santo jeē ní jito ndijin rī, te ndajéhé un ní jeca ya ruhū cuahān yā jín rí xinī ñn yucu cáhnu súcún. Te ni steén yā nuū rī maá ñuu íi cujéhnu jeē cúu Jerusalén, te ni cuun vēji nde andiví núu néne Yaā Dios. ¹¹ Te ndíndēé ndasí ñuu un nájnūhun ndíndēé Yaā Dios. Te xíñú nájnūhun xíñú ñn yuū luu jeē ndeé yahu ndasí, nájnūhun yuū cuijín jeē quiyí nájnūhun vidrio. ¹² Te yuhu ñúu un ní jicó ndúu ñn jeē cáhnu súcún ndíhyú ñuu ún. Te íyó úxī uū yehyí. Te tāca yéhyí un íin ñn ndajéhé yā. Te tāca yéhyí un yósó síhví ndihúxí uū yucūn Israel. ¹³ Te lado nuū cáne niāndii iyó únī yehyí. Te lado

norte suni íyó únī yehyí. Te lado sur suni íyó únī yehyí. Te lado nuū quée niāndii suni íyó únī yehyí. ¹⁴Te íyó úxī uū yuū náhnu jeē cúu cimientu maá jéē ndihyú ñuu ún. Te tāca yúū un yósó síhví ndihúxí uū apóstol maá Yaā cúu Londe.

¹⁵Te ndajéhé jeē ni cáhān jíin rí, ndáhá yá ñn yujnu oro jeē chícuāha yá ñuu un jíin táca yéhyí jíin máá jéē ndihyú ñuu ún. ¹⁶Te ñuu ún chi ñn cūhva-ni cúu ndicúún lado. Chi jeē cáni jíin jéē jité, ñnuú-ni cúu. Te ndajéhé un ní chucuāha yá ñuu un jíin yujnu ún. Te née uū mil uū ciento kilómetro jeē ñn ñn lado. Te ñnuú-ni cūhva jeē cáni, jeē sucún, jíin jéē jité. ¹⁷Te suni ni chucuāha yá maá jéē ndihyú ñuu ún, te née unī xico cuūn metro jeē sucún. Te yūcuan cúu cūhva jejníñu ñayuu, jeē suni jéjníñu ndajéhé un.

¹⁸Te máá jéē ndihyú ñuu un ní cuvāha jíin yúū cuijín quiyí. Te ñuu ún chi máá nene oro cúu, te cáa nájnūhun vidrio quiyí. ¹⁹Te tāca yúū jeē cúu cimientu maá jéē ndihyú ñuu ún, ní cucutú jíin ndinuū yuū luu jeē ndeé yahu. Yuū ñn cúu yuū cuijín quiyí. Te jeē uú cúu yuū ndeé ndíí. Te jeē uní cúu yuū pinto. Te jeē cuún cúu yuū cuí ndíí. ²⁰Te jeē uhún cúu yuū pinto jeē ñúhun raya. Te jeē iñú cúu yuū cuehé pinto. Te jeē uxá cúu yuū cuaán quiyí. Te jeē uná cúu yuū cuí ndeé. Te jeē ñn cúu yuū cuaán ndíí. Te jeē uxí cúu yuū cuí cuijín. Te jeē uxí ñn cúu yuū cuehé cuaán. Te jeē uxí uū cúu yuū ndihí ndíí. ²¹Te ndihúxí uū yehyí un cácuu uxí uū perla jeē ndeé yahu. Te ñn ñn yéhyí cúu ñn ñn perla. Te máá nene oro cúu calle cáhnu ñuu ún, te quiyí nájnūhun vidrio.

²²Te tú na templo ni jító ri ini ñuu ún, chi níí

cáhnū ñūū un ndéé máá Jítóho yō, Yaā jñi ndihi poder, jín Yaā cúu Londe. ²³ Te ñūū ún tu jíní ñúhún cundijin jín luz niāndii jín yóō. Chi jeē ndíndēe máá Yaā Dios cúu jeē cundijin ñūū ún. Te luz ñūū un cúu máá Yaā cúu Londe. ²⁴ Te ñayuu tācá nación ñayiví jeē ní jnama ya, caca i jeē cundijin luz ñūū un núū i. Te tāca rey ñayiví quijicoo de ñūū ún, quindeca de tācá ndajniñu jeē ndeé yahu jín jeē cujéhnū de sáha. ²⁵ Te tāca yéhyí ñūū ún ma cóndihyū cuiti nduú, chi tú na jecuáa coo. ²⁶ Te ini ñūū ún quijicoo ñayuu tācá nación, quindeca i tācá ndajniñu jeē ndeé yahu jín jeē cujéhnū i sáha. ²⁷ Te ma quívicoo cuiti ni ñin jeē jnehén. Ni ma quívicoo ñayuu casáha jniñu néé jín jeē castáhu. Chi quívicoo máni máá ñáyuu jeē yosó síhví i nuū libro jeē yosó síhví ñáyuu cotecu ñí cáni, jeē névāha Yaā cúu Londe.

22

¹ Yūcuán na te ndajéhé yā ni steén yā nuū rī ñin yūte íyó ndoo. Te ndute un sáha jeē cótecu yō ñí cáni. Te xíñú nájñūhun vidrio, te cáne nuū mesa nuū ndácu Yaā Dios jniñu jín Yaā cúu Londe. ² Te jíca yūte ún sava mēhñu calle cáhnū ñūū ún. Te ndíndúú lado yuyúte un yñi yujnu jeē cótecu yō ñí cáni sáha. Te yujnu un jéhe ndehē uxī uū jínu jeē ñin cuiyā, chi tāca yóō cúun ndehē. Te ndaha yúcu i cúu tajnā jeē ndúvāha ñayuu tācá nación. ³ Te tācá-ni jeē ní cáhān yā jeē násūu jéé váha cúu, ma cóo ini ñūū ún. Te ini ñūū ún cuiñi máá mesa nuū ndácu Yaā Dios jniñu jín Yaā cúu Londe. Te ñayuu cáccandije jeē cácuu i mozo yā, chiñúhún i ya. ⁴ Te coto i nuū yā, te condee síhví yá jneē i. ⁵ Te ma cóo ga jecuáa

ñuu ún. Te ñayuu cáyūcu yúcuan tuá jíni ñúhún i jeē cúndijin lámpara nuū i, ni jeē cúndijin niāndii. Chi jeē ndíndēe máá Jítóho yō Yaā Dios cúu jeē cúndijin nuū i. Te ndacu i jniñu ní cáni cuíti.

Jeē cuácuyajni ndiji Cristo

⁶ Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jíin ndije ró jēē ndaā cúu. Te Jítóho yō Yaā Dios, máá yá sáha jíin tée cánacani jnúhun ya jeē jíin Espíritu yā cánacani de. Te suu máá yá ni tají yá ndajéhé yā návāha stéen nuū ñáyuu cácuu mozo yā tācá jniñu jeē yachī coo.

⁷ Ndiji yachī rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núu tútu yáha.

⁸ Te ruhū Juan, ni jini sōho ri tāca jnúhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuiñī yití rí nuū jehé maá ndajéhé jeē ni stéen tācá jniñu yáha núu rí, jeē chiñúhún rí yā nuú. ⁹ Te ni cahān ndajéhé un jíin rí:

Ma sáha ró súcuan. Chi ruhū suni mozo Yaā Dios cúu rí, nájnúhun máá ró jíin táca hermano rō jeē cánacani jnúhun ya, jíin ndíhi ñayuu cájetáhú jnúhun yósó nuū tútu yáha. Sa suhva nuū maá Yaā Dios chiñúhún ró. Achí yá.

¹⁰ Te ni cahān gā ndajéhé un jíin rí:

Ma chísāhi ró táca jnúhun Yaā Dios jeē yosó núu tútu yáha, chi je cuacuyajni tiempo jeē cúndaā ndíhi. ¹¹ Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuan. Te sa ñayuu casáha jniñu ndaā, na sáha ga

i jniñu ndaā. Te ñayuu cáhīyo ndoo ánuá, na cáca ndoo ga i súcuan. Achí ndajéhé un.

¹² Jendaá jeē ndiji yachī rī, achí Jesús. Te quiji ri jíin táhū cuāha ri nuū ññ ññ ñayuu, núu ndese jniñu ni casáha i. ¹³ Máá rí cúu nájnūhun letra A xīhna ñúhún jíin letra Z jeē sándīhí na, chí íyó rí nde xīhna ñúhún te coo ri ní cáni.

¹⁴ Nacā jeē ndetū ñayuu jeē jéhe i jnūhun ndundoó ánuá i nájnūhun ndúndoo sahma. Chí cuu caji i ndehē yujnu jeē sáha jeē cótecu i ní cáni, te cuu quívicoo i yéhyí ñuu iī ún. ¹⁵ Te ichi fuera ñuu ún cuiñi ñayuu tu cácadíje, jíin ñáyuu casáha tási, jíin ñáyuu cájica jnéni, jíin ñáyuu cájehni ndīyi, jíin ñáyuu cáchiñúhún ídolo, jíin ñáyuu cácusñ ni stahú jnáhan.

¹⁶ Máá rúhū Jesús, ni taji rí ndajéhé rī návāha castūhun yá tāca jnúhun yáha nuū tāca grupo ñayuu cácadíje. Te máá rí ni sáha jeē ni íyo rey David, te ni quiji ri nuū yucún David. Te cúu ri nájnūhun lucero ndíndēe cáne cúndijin. Achí yá.

¹⁷ Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñáyuu jeē jíni sōho, suni na cáhán i:

Nehen, quívicoo ró ndaha ya.

Te tāca ñáyuu cájichī jeē cácuni i coho i, na quívicoo i ndaha ya, te súcuan-ni na cóho i ndute jeē cótecu i ní cáni sáha.

¹⁸ Te tāca ñáyuu jíni sōho jnūhun Yaā Dios jeē yosó núu tútu yáha, cáhán níhin ri jíin i: Núu ndé ñáyuu chisóo i nuū jnúhun cáhán tutu yáha, te Yaā Dios chisóo yá jnūndóho cáhán tutu yáha, ndoho i. ¹⁹ Te núu ndé ñáyuu quende i jecu jnūhun cáhán tutu

yáha, te Yaā Dios quende yā tahū i jeē yosó núū libro jeē yosó síhví ñayuu cotecu ní cáni, te ma nihín i tahū i ini ñuu iī ún. Te tutu yáha cúu jeē cahán siquī tācá un.

²⁰ Te Yaā jeē ni cáhān tāca jnúhun yáha, suhva cáhān yā:

Jendaá jeē ndiji yachī rī, achí yá.

Amén. Súcuan na cóo. Jítoho ná Jesús, jícán tahú na jéē ndíji yachī ní.

²¹ Te ñúhun ni rī jeē Jítoho yō Jesucristo na sáha ga yā jeē váha róhó jíjnáhan ró. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9665e546-39d0-5bd5-8b10-38916a94951f